

Sudeutsa asaktsa Sesus harere bo hỹ mykaranaha sibo ziwatahaka

Tubabatu Deus Sudeutsa isopykwytša nisispirikpo asahi iharere bo tsikaeni zuba ma zikaha iwaze aty ja Sudeutsa bo ziwatahaka, Sesus soho ty nisispirikpoko. Sesus zuba Deus bo mymyoktyhyrykta atahi myhyrizikwanikita ana hi ziwataha. Deus hyrikoso ituk niapykyryk tahi iwatahi Deus harere ziwataha. Abaka katsa kino niwatihi Sesus soho humo tanymyryky.

Deus tse babata.

¹ Tapara Deus taparaktsa bo ziknapamykysoko iharere ziwabykynaha. Hawa hatsa myzotsa Sudeutsa bo ziknapamykysokonaha. Deus so-hokotsa taparaktsa bo iharere ziknatsasokonaha.

² Abaka Deus tatse mybo zipeha, atahi Deus harere mybo motsasoko. Atahi mybarawy nizukni Deus harere eze. Deus isuknihyize ipe:

– Mybarawy tsizubarēna abo nyny my – niy.

³ Atahi imysapyrēnikita my. Atahi imykyzonikita my. Deus wata my, hawa Deus mykara mymywatawyky. Iharere humo mybarawy ezektsa bo pisapywyky. Mybarawy iharere humo wasani mykara. Atahi mysapyzēky nihyrikosokda iwaze mymysapybyitsa tsikykaranaha tismoewynahaze atahi mymyokzohik. Iwaze bjoikpe bo nido.

Deus humo ba hawa tohi zikaha ibaze tadyhy.
Deus tihi:

– Kapanuryk taba dyhyty – niy.

Deus tse bijoikpe iknyktsitsa ahatsa soho.

⁴ Atahi taparakta my. Bijoikpe iknyktsitsa Deus tsumuëhĩtsitsa simysapyrëtsa maha atakta tsimysapyrëta babata my. Deus bijoikpe iknyktsitsa soho – Ikiatsa katsumuëhĩtsitsa tsimaha – my.

Deus ipe niy: – O katse babata tsimy – my

⁵ Ba bijoikpe iknykta soho Deus ipe: – Iki katse tsimy. Aba azo mozik – niy.

Ana harere ty hi batu tyso. Iwaze tihi: – Iki kape kazo asopyk.

Utakta ipe katse my – niy.

Anaharere batu bijoikpe iknyktsa bo ziky.

⁶ Iwaze Deus tse babata estuba zubata mybarawy bo zipehaze Deus tihi:

– Bijoikpe iknyktsitsa sizubarëtsa katsumuëhĩtsitsa ibo mynasakibazikiknahaktsa!

“Ikiakta tsamysapyrëta. Ahumo mykurëtsa hỹ” tsimaha – niy.

⁷ Deus harere papeu humo bijoikpe iknyktsa soho botu ziwatahakanaha.

– Bijoikpe iknyktsitsa katsumuëhĩtsitsa maha.

Mysipehaze aidytsa mykaranaha zopok waha.

Deus harere bo ma mykaranaha.

Asaktsa imysapybara izo hyrity watsa – niy.

⁸ Itse soho zuba Deus harere papeu humo tihi: – Iki zuba mybarawy ezektsa tysipehakakta.

Awahi abazubata tsimy.

Hawa tsimykara ba zimyi wasani tsimykara.

⁹ Hawa ha ty tisapyrēna hyỹ tynakara, hawa ha ty batu isapy batu hỹ tynakara.

Iwatahi Deus zawatawyhik ba iakyri tabo zikozonaha.

Atuktsa sakurētsa moziknaha, ikia zuba akubabata – niy.

¹⁰ Deus harere niwatihi papeu humo:

– Ikia abazubata koikny bakta tu mybarawy tsikzukni.

Ikia hi bijoikpe tsikzukni wytyk tsikzukni.

¹¹ Mybarawy mopykba. Ikiakta awahi tsimynapykyk ba zikokza.

Mybarawy mysuk isapy barawa mozik.

Hawa mysuk mysykbaikze mopapykiknaha.

Anawahi mybarawy mysapybyrize mohokda.

Iwaze Deus usa mybarawy isapyzeken mozokni.

¹² Hawa mysuk ty zozozo tsimaha iwaze usta mysuk tsikorobyknaha.

Ikia mybarawy mopykze iwaze usa mybarawy isapyzeken mozokni.

Ikia zuba koikny baktatu astatu tsimy, ba zik tsaikba.

Awahi amysapyrēta – niy.

¹³ Deus bijoikpe iknykta humo batu ziky iwatahi batu ipe my:

– Kabaze dyhy ty! Kapanuryk taba dyhy ty!

Bykyze kazikwy humo asukyrytsitsa aharere bo hyỹ mykaranaha – niy.

¹⁴ Bijoiupe iknyktsitsa hawa mykaranaha. Asaktsa sihyrikosotsa maha. Deus tsumuēhītsitsa maha. Deus tyryktsa bo mysiakzoko, mysitsumuēhĩnaha. Deus tyryktsa Sesus Kiristu

humo simysapyrëtsa moziknaha, iwaze sibo Deus bijoikpe iknyktsitsa mysiakzoko.

2

Deus harere tsiwabytoktokonahaktsa.

¹ Deus tse babata mybo ziakzo iwatahi iharere bo tsiwabytoktokonahaktsa! Iharere wasani zuba. Pykyhytu iharere bo hyĩ tynakaranaha iwaze myspirikporëtsa tsimoziknaha.

² Deus harere taparaktsa bo nitsasokonahaze bijoikpe iknyktsa ana ty hi hyĩ nikaranaha. Anaharere bo myzotsa batu hĩ nikaranaha iwatsahi sinini nikaranaha.

³ Katsaktsa ja. Abaka Deus wasania ty tsipi-wabytoktokonaha zeka Deus pe myzo mysopyk. Deus wasania ty tywabyziu ahabyizeka batu Deus pe myzo mysopyk. Sinini tsimykaranaha hĩ. Myzotsa watsa sinini tsimykaranaha. Bijoikpe iknyktsitsa batu mybo tyso hawa Deus pe myzo mysopyk. Sesus abazuba tahi ituktsa bo Deus wasania ty nitsaso. Hawa Deus pe myzo mysopyk sibo nitsasoko. Iwaze asahi:

– Nawa ha ty botu tsiwabynaha iharere baba, ana humo kino wasani hĩ – niaha. Iwaze ituktsa mybo nitsasokonaha.

⁴ Iwaze Deus siharere bo yhĩ mykara. Tahyrikoso humo hi amy ty kytsa batu zikaha asatu mykaranaha. Deus hyrikoso situk mynapykyryk iwaze aparakbaha mozororobanaha, Deus zikwy humo. Deus isapyha ty aparakbaha bo nyny niy. Deus hyrikoso situk mynapykyryk iwatsahi kytsa sipybyrëtsa. Iwaha humo Deus siharere bo yhĩ

mykara. Iwatsahi wasania ty ahabyi zeka sinini tsimykaranaha.

– *Sesus Kiristu Deus zipehata Deus bo mymyoktyhyryk* –.

⁵ Iwaze mybarawy mopykze Deus usa mybarawy mozokni. Deus hi:

– Mybarawy ezytyk ezektsa ahaharere bo yhy mykaranaha – niy. Ana kino bijoikpe iknyktsitsa batu tyso. Katsaktsa mybarawy ezektsa bo nitaso.

⁶ Aty Deus harere botu ziwatahaka:

– Kazo kytsa asaktsa nisisukni sipunihikbyitsa maha.

Iwatsatuze asaktsa ba zikspiriktsokda.

Sihumo tsimypokzitsiukrēta.

⁷ Abaka bijoikpe ezektsa sihyrizikwanitsa. Mybarawy ezektsa batu.

Aiba tohi mybarawy ezytyk myze mybarawy ezektsa myhyrizikwanitsa tsimoziknaha,

Deus humo aparakbaha sizubarētsa myharere bo yhy mykaranaha.

Simysapyrētsa moziknaha – niy.

⁸ Abaka mybarawy ezektsa ispehatsabyitsa.

Aiba tohi zuba mybarawy ezytyk ezektsa mysipeha.

⁹ Abaka Sesus bo iktsa tsimaha. Deus wytyk bo zipehaze jokboa tu mywata niyzik. Bijoikpe iknyktsitsa sihyrizikwanitsa niyziknaha. Abaka mekybotu my. Sesus nihyrikosokda humo atahi abazubata mozik. Aparakbaha iharere bo zuba hyhy mykaranaha. Deus mywatu imypokzitsi iwatahi Sesus mysapyzeken nihyrikosokda.

¹⁰ Deusta koikny bakta tu mybarawy nizukni. Tsizubarēna nizukni. Iwatahi mybarawy ezektsa tatuktu mysisapy tsihikik, ihyrytsa moziknaha anawahi mozihikik. Iwatahi Sesus mymyoktyhyrykta mysapyzeken sinini nikara, wasani my. Deus aparakbaha humo tsimypokzitsiukrēta iwatahi itse babata mysapyzeken sinini nikaraze – wasani my – Deus niy.

¹¹ Sesus humo mywatu simysapyrētsa moziknaha. Deus tse babata humo simysapyrētsa moziknaha. Sisapyrēnikitsaktsa Deus hyrytsa maha. Iwaze Sesus myzubaha okze:

– O asaktsa simysapyrētsa maha utakta ispe: “katukytsa” kasopyk – niy.

¹² Hawa nitsaso botu Deus harere papeu humo ziwatahaka. Ata tihi:

– Kazo asoho katukytsa bo motsasoko, izumubanhaze abo mosakibaziki “O kazo ikia tsamysapyrēta” – niy.

¹³ Deus harere papeu humo ziwatahazo. Ta tihi:

– Utakta Deus humo kaspirikporēta iwatahi iharere bo hyŷ iky – niy.

Ata tihizo: – Utakta kahyrytsa tuk mynapykyryk. Deus hi isty kabo nyny niy – niy.

Iwa botu ziwatahaka Deus harere papeu humo Sesus soho ziwatahaka.

¹⁴ Sesus mybarawy ezekta mywata niyzik. Mybarawy ezektsa ihyrytsa tsimoziknaha. Mytsani myspu tsimaha iwatahi mywata niyzik. Mybarawy ezekta tuze mohyrikosokda ziky. Nihyrikosokdaze hyrikoso sapybara nisipehakata,

Satanas inarokota, Sesus humo zikwybyita niyzik. Sesus ba hawa tohi zikzukni iwatahi Satanas zikwybyita niyzik. Tapara Satanas myzubaha ziknamykbabaka abaka batu, Sesus tahyrikosokdawy humo iwaze Satanas myzuba myhyrikosokdawy batu ziky.

¹⁵ Mybarawy Ezektsa batu mohyrikosokda tsihikiknaha. Pibytuhukutu tahapyby myziykyknaha. Tahapetu sisopyk tihi:

– Utakta ba zikara – mynakaranaha. Sesus hi mysapyzekenihyrikosokda. Abaka mywatu ispe:

– Tsimyhyrikosokdanaha zeka ahapyby byihu ja – my.

¹⁶ Sesus bjoikpe iknyktsitsa ba ziksitsumuēhĩ. Mybarawy Ezektsa Abarão tsekokatsa asa hi mysitsumuēhĩkĩ asaktsa ihumo simysapyrētsa moziknaha. Atahi Deus bo mysioktyhyryk.

¹⁷ Iwatahi mybarawy Ezektsa Deus bo mysiooktyhyrykta itukytsa wata niyzik. Mybarawy Ezekta niyzik. Sesus taparakta Deus wahoro zubbata eze ziknapamykysokota wata niyzik. Atakta Deus tsumuēhĩtsa my, Sesus niwatihi. Deus tsumuēhĩtsa my. Ziknapamykysokota mybarawy Ezektsa nisitsumuēhĩkĩ Sesus niwatihi mybarawy Ezektsa nisitsumuēhĩkĩ. Mybarawy Ezektsa humo tsimypokzitsiukrēta hỹ. Sesus Deus harere bo hyỹ ziknakara, iwatahi imysapyrēnikita my mybarawy Ezektsa sapyzekenihyrikosokda iwa Deus bo nisioktyhyryk iwatahi mywatu ihumo simysapyrētsa moziknaha, iwatsahi Deus pe:

– Myzo – mysopyk. Deus mype:

– Kahyrytsa ahasapybyikitsa tsikykaranaha Sesus humo pahaokzo – iwa Deus mykara.

¹⁸ Sesus sinini nikara. Satanas hyrikoso sapybara ty zimyiwy tsihikik naha zetu batu hỹ niy. Iwatahi Sesus mybarawy ezektsa mysitsumuẽhĩ. Asaktsa ustsá mysimiywy tsihikiknaha ata hi mysitsumuẽhĩkĩ iwatsahi wasani zuba yhỹ mykaranaha. Iwatsahi batu simyi ana humo hi Sesus mybarawy ezekta niyzik iwatahi mywatu namytsumuẽhĩkĩ.

3

Moises Deus tsumuẽhĩtsa. Sesus Deus tse babata.

¹ Iwatsahi Sesus soho humo mytsatziutaha katukytsa! Deus nimywatawy ityryktsa tsimoziknaha. Sesus hi mybo nitsasoko Deus zipehata my mywata niyzik. Atakta ziknapamykysokota taparakta myhyrizikwani. Ustsá bo tihi zeka:

– O katsaktsa Sesus mymyoktyhyrykta humo myspirikporẽtsa tsimoziknaha iwatahi mymytsumuẽhĩkĩ hỹ – tsimaha. Iwatsahi Sesus soho humo mytsatziutaha! my.

² Ata kino Deus harere humo hyỹ ziknakara, iharere humo pykyhytu hyỹ ziknakara. Moises Deus harere bo yhỹ ziknakara. Atahi Deus tyryktsa nisihyrinymyryky. Sesus kino niwatihi Deus harere humo pykyhytu hyỹ ziknakara.

³ Atakta abazubata. Sesus abazuba tahi Moiesta jokboata tu iwatahi Sesus harere bo hyỹ tsimykaranhaze wasani tsimykaranhaha. Kytsa wahoro mozoknikinahaze katsaktsa:

– O awahoro tisapyrẽta ikia asopykziurẽta – tsikaha. Maku tsihyrinymyrẽta iwahoro nizukniki naha humo. Moiesta jokboata tu zuba myhyrizikwani my. Deus Sesus soho:

– Ikia abazubata – my. Iharere abazubata my.

⁴ Kytsa wahoro zuba nizuknikinaha. Deusta mybarawy tsizubarêna nizukni.

⁵ Moises Deus hyriziktsokzawy wasani ziknakara. Deus tyryktsa nisihyrinymyryky iwa tarabaja ziknakara. Hawa Deus mykara nisihyrinymyryky. Deus tyryktsa humo tsimypokzitsiukrêta atakta Deus tsumuêhîtsa zuba.

⁶ Sesus Kiristu hi Deus isopyk katse babata my. Atahi Deus hyrytsa humo tsimypokzitsiukrêta hỹ. Katsaktsa Deus hyrytsa tsimaha, atakta myperytsa zubata. Mypunihikrêtsa zeka katsa tihi:

– O Sesus humo mysapyrêtsa tsimoziknaha, mywahi Deus tuk tsimynapykyryknaha ana humo ka mykurêtsa hỹ – tsimaha.

Deus tyryktsa iziuha bo tsimypupunaha.

⁷ Iwatsahi Sudeutsa siakbatsa ba siwa zikaha! Tubabatu Deus hyrikoso sisoho ziwatahaka:

– Abaka kaharere tsiwabynahaktsa!

⁸ Kaharere tsipiwabynahaze batu hỹ tsimaha iwaze batu tyso.

Taparaktsa ahadiritsa kaharere bo batu hỹ ziknakaranaha sioktsiokanikitsa.

Jerukbara eze tuze kaharere bo batu ma zikaha.

Tahapetu sisopyk:

⁹ “O katsaktsa mysapybyitsa tsimykaranaha zeka Deus myhumo batu iakyri” nikaranaha.

Sitsyhyryze kazikwy iwatawy iwatsa tu kaharere bo batu hỹ ziknakaranaha.

¹⁰ Kuarêta nityktseheze ziknasitsumuêhîkî iwatsa tu kaharere bo batu hỹ ziknakaranaha.

Iwaze sihumo takyriki.

Kapetu kasopyk: “O simysapybyitsa soho humo mytsaty ziknakaranaha.

Kasopyk humo batu sihyrinymyry iwatsahi zikmyikinaha” iky.

¹¹ Iwatahi ikykubyrisorokbyize

batu aty tohi katuk zikapykyryk iky – Deus hyrikoso niy.

Deus harere hi papeu humo botu ziwataha.

¹² O katukytsa pykyhytutaha! Hawa mytsaty tsimykaranaha pykyhytutaha! Deus koikny bakta tu tawahi my atahi zinymyrybata. Hawa ja isapybara bo mytsaty tsimykaranaha zeka tamyikik tsimaha. Iwaze Deus harere humo batu hỹ tsimykaranaha iwatsahi pykyhytutaha! Ahamyspihikbata byihuja!

¹³ Pibytuhukutu tyharape kusuknikinahaktsa! Iwaze tsimahaze ba ahamyiwy. Deus mydiritsa siakbatsa pe:

– Aba kaharere humo hyỹ tahaktsa – niy. Deus kino myhumo niwatihi – Abaka kaharere humo hyỹ tahaktsa! – my, iwaze tyharape punihik-wynahaktsa kytsa! Sesus Kiristu humo tsikaha spirikpotohinaha.

¹⁴ Tapara Sesus humo ahaspirikporëtsa ihumo ahakurëtsa tsikyziknaha. Iharere wasani tsimaha. Ihumo tyspirikponaha! Kyze mywahi ituk tsinapykyryknaha. Tsimyhyrikosokdanahaze Kiristu watsa tsimoziknaha.

¹⁵ Deus harere papeu humo:

– Abaka kaharere bo wabytaha!

Kaharere tsiwabyahaze batu hỹ iwa batu tyso.

Taparaktsa ahadiritsa kaharere bo batu ma ziknakaranaha

Ba siwa zikaha! – niy.

¹⁶ Mydiritsa Deus harere ziwabynaha. Mydiritsa Deus harere humo batu hỹ ziknakaranaha. Asaktsa Moises Esito ekze nisioktyhyryk nahatsa.

¹⁷ Asaktsa jerukbara buruk niukurunaha. Isapybara ty nikaranaha ana humo hi Deus takyriki, iwatsahi jerukbara buruk niukurunaha. Kuarêta nityktseheze ziharamuze. Anaeze sizubarêtsa niakbanaha.

¹⁸ Asa kino Deus harere bo batu hỹ ziknakaranaha. Iwatahi Deus hi: – Iziuha botu nikymy ba zikapykyryknaha – niy. Iwa hỹ niy.

¹⁹ Iwatahi ziuha Deus botu nikymyze ba zikpupunaha. Iharere humo batu hỹ ziknakaranaha, iwatsahi iziuha bo ba zikpupunaha.

4

¹ Deus hi mybo nitsasoko tahi:

– Iziuha aha bo ikymyba anaeze tsimypykyryknaha – niy. Katsakta pykyhytu tsimahaktsa! Imysapybara ty tsimykaranaha zeka tsimyiwyknaha! Deus harere humo zuba hyỹ tahaktsa. Iwaze iziuha bo tsinapupunahaktsa!

² Mydiritsa siakbatsa Deus harere ziwabynaha. Ana ty hi batu hỹ ziknakaranaha. Deus nisyapywy tsihikik batu zik asahi iharere humo batu hỹ ziknakaranaha. Katsa kino niwatihi Deus wasania ty tsiwabykynaha. Pykyhytutaha anaharere humo hyỹ tsimahaktsa!

³ Katsaktsa ihumo myspirikporētsa iwatsahi iziuha bo abaka tsimynapupunaha. Anaeze tsimymybyrynaha. Hawa Deus byrykywy katsa kino niwatihi tsimymybyrynaha. Deus mybarawy nizuknibaze tabyryky, tahyrikzitsokzawy zipyke tabyryky. Katsa kino niwatihi iziuha eze tsimybyry tsihikiknaha. Taparaktsa mydiritsa siakbatsa Deus sisoho tihi:

– Iziuha eze botu ahabo ikymyba
ba zikabyry – niy.

Sihumo takyriki iwa niy.

⁴ Deus tabyrywy soho iharere papeu humo ziwatahaka:

– Nawa zuruze usta tsyhyry humo estuba zuba
ziakbataze Deus mybarawy nizukni.

Kyze nawa zuruze usta tsyhyry humo petok
ziakbataze tabyryky tahyrikzitsokzawy
zipyke – niy.

Deus harere papeu humo ibyrykywy soho.

⁵ Deus harere papeu humo ziwatahazo mydiritsa siakbatsa soho:

– Iziuha eze botu ikymyba ba zikabyry – niy.

⁶ Deus iziuha bo kytsa mynapupunaha mozihikik. Asaktsa mydiritsa siakbatsa hi iziuha eze Deus botu sitsyhyryze zikymyba, ba zikpupunaha, anaeze ba zikabyry. Iharere humo ma zikahabyitsa tuze iziuha bo batu paku paku. Iwaze Deus ustsya kytsa iziuha bo mynapupunaha iwa mozihikik.

⁷ Bykyze iwatahi usta zuruze soho:

– Abaka kaharere humo hyỹ tsimaha – niy.

Deus harere Dawi ziwatahaka hi:

– Abaka kaharere bo wabytaha!

Kaharere tsipiwabynaha zeka ahasopyk-sapyhu ja – niy.

Iwa Dawi tsekokatsa ziwatahaka.

⁸ Sosue nihyrikosokdata Deus tyryktsa, Kanaã bo nisioktyhyryk. Deus iziuha nisioktykyryk zeka Deus usta zuruze soho:

– Abaka kaharere bo hyÿ tsimaha – batu tyso. Nawa Dawi ziwatahaka ustsya tyryktsa soho niy. Asahi Deus iziuha bo mynapupunaha.

⁹ Iwatahi Deus hyrytsa pe niy:

– Kahudikhudikwy tisapyrëna bo tynapupunahaktsa! – my. Deus mybarawy nizuknize iwaze tabyryky. Tabyryky nahawatihi katsa kino tsimymybyrynaha anawahi Deus mozihikik.

¹⁰ Deus sapy iziuha bo tsinapupunaha zeka tsimymybyrynaha. Myhyriziktsokzawy mopyk. Hawa Deus tabyrykyze katsa kino tsimymybyrynaha hÿ.

¹¹ Iwatsahi Deus hudikhudikwy tisapyrëna boktsa! Ana soho bo hi mytsatzyiutahaktsa! Mykubyrisorokrëtsa tsimoziknaha iwaze iziuha bo tsimaha. Ba siakbatsa wa zikaha. Asaktsa Deus harere humo batu hÿ ziknakaranaha iwatsahi Deus hudikhudikwy bo ba zikpupunaha.

¹² Deus harere ka simyharerewabytsa wata my. Iharere mynamyhyrinymyryky. Deus harere tsipiwabynahaze hawa ha ty mytsaty tsimykaranaha mymywatawyky. Hawa tsimyzihihiknaha mymywatawyky. Mytsaty tsimykaranahaze hawa ha ty wasani my Deus harere mymywatawy. Mytsaty tsimykaranahaze hawa ha ty batu isapy iharere mymywatawy. Deus harere sokorotsapu wata. Sokorotsapu

titsarirēta, petok taba itsariwyhyta tawata. Siraratsa nizykyrywy wata. (Ipoiktsa sotsokowy buruk maha sokorotsapu tuk tszykwynaha. Iwatsahi myraratsani sipoiktsa iknyktsa tsiboknaha.) Hawa sokorotsapu myraratsani metutu mykara nawaze Deus harere hawa mytsaty tsimykaranaha hawa tsimyzihihiknaha metutu mykara.

¹³ Deus zinyba hỹ, katsa ba ijokbyi bo zikaha. Hawa tsimykaranaha zinyba. Tsimyhyrikosok-danahaze atahi mymywaby. Tsimytsasonahaze:

— O nawa ikykara — botu ziny iwaze hawa tsimytsasonahaha wasani tsimaha zeka tsihyrinymyrēta. Iwatsahi mydiritsa watsa byitahaktsa! Deus harere bo hỹ tsimahaktsa iwaze Deus hudikhudikwy tisapyrēna bo tsimypupunaha

Sesus ziknapamykysokota babata myhumo tsimypokzitsiarēta.

¹⁴ Tubabatu taparakta ziknapamykysokota Deus wahoro zubata bo ziknatsukuk. Iwatahi Deus tse babata bjoikpe bo nitsuk Deus tuk. Atahi abazubata. Iwatsahi ihumo tsimyspirikpotohinaha.

¹⁵ Taparakta Deus wahoro zubata eze sizubarētsa nisitsumuēhĩkĩ. Asaktsa batu sipunihik nisitsumuēhĩkĩ. Sesus hi mymytsumuēhĩkĩ atahi mybarawy eze ziknapykyrykze sinini ziknakara. Iwatahi mymytsumuēhĩkĩ. Satanaz zimywy tsihikik Sesus iharere bo batu hỹ ziknakara. Iwaze Satanaz nimymywy tsihikikze Sesus mymytsumuēhĩkĩ myhumo tsimypokzitsiukrēta. Atahi mymypokzitsiki ta

mywata niyzik. Hawa haty tsimykaranaha zinyba iwatahi mymytsumuēhĩkĩ.

¹⁶ Iwatsahi Sesus bo tsipomokonaha. Mysikpy-bybyitsa Deus myzo bo tsimypamykysobanaha. Mypunihikrētsakta! Deus myzo hi mymysapywyikik. Myhumo tsimypokzitsiukrēta. Mypunihikbyitsa zeka atahi mymytsumuēhĩkĩ. Iwatsahi mypunihikrētsa tsimoziknaha.

5

¹ Hawa taparakta Deus wahoro zubata eze ziknapamykysokonahatsa siwatawyhytsa niyzik naha motsasoko. Deus nisiwatawy kytsa tu nisiwatawy. Iwaze kytsa nisitsumuēhĩnaha ana humo hi Deus nisiwatawy. Nawa ha ty kytsa Deus bo zibiakaknaha ana kino Deus bo nyny niaha. Aparakbaha humo nyny ziknakaranaha. Deus okzeka myraratsa nisiwezokonaha iwatahi Deus sitsihitsa humo batu iakyri simysapybyitsa nikaranaha nisiokzohik.

² Sipunihikbyitsa tu iwatsahi harape humo simypokzitsiukrētsa niaha. Asakta zimyikinahatsa humo simypokzitsiukrētsa. Asakta batu sihyrinymyry niwatihi sihumo simypokzitsiukrētsa. Taparakta Deus wahoro zubata eze ziknapamykysokonahatsa sipunihikbyitsa kino nikaranaha. Iwatsahi ustsaha humo simypokzitsiukrētsa niaha.

³ Asakta kytsa watsa. Iwaze myraratsa Deus okzeka nisiwezokonahaze asahi:

— O Deus kamysapybyita tu ikykara iwatahi karara ty ikia bo nyny my iwaze tsikokzohik. Iwaze ikia kape:

“Amysapybyita tu tsikykara paokzohik myraratsa tsihitsa niwatihi simysapybyitsa tu nikaranaha iwaze myraratsa ty kabo nyny tsimykara iwaze mysiokzohik my” – nikaranaha.

⁴ Batu aty tohi ziktawatawy ziknapamykysokota zikyzyk. Batu. Deus humo maku ziknapamykysokota mozik ata hi maku ziwatawy. Arõ tapara ziknapamykysokota niy. Deus humo iwatawyhyta niyzyk.

⁵ Taparaktsa Deus wahoro zubata eze ziknapamykysokonahatsa siwatsa Kiristu mynakara. Siwatsa ba ziktawatawy, Deus hi ziwatawy. Iwatawyhyta tu Deus ipe niy:

– Ikiakta katse, abaka azo mozik – Deus niy.

⁶ Usta harere Deus papeu humo ziwatahaka:
– Merikisedek wata tsimozik.

Merikisedek Deus ziknapamykysokota Deus wahoro zubata eze ziknakara. Aparakbaha nisibetesaka Sesus iwata katyryktsa tysitsumuẽhĩ mynakara.

Mysibetesaka, tawahi mysitsumuẽhĩ
Deus harere papeu humo niy.

⁷ Sesus mybarawy ezekta tu Deus bo ziknapamykysoko. Deus bo hua hua niy, ihyritsik zipoko. Deus zikwybata tu nizihikik zeka ziaксе iwa zeka batu zikyrikosokda. Iwaze Deus zitsumuẽhĩ Sesus tasoho bo zuba batu mytsaty ziknakara, tazo bo zuba mytsaty ziknakara. Iharere bo zuba hyỹ ziknakara. Iwatahi Deus iharere ziwabyky.

⁸ Atakta Deus tse babata niy. Iwatatu sinini ziknakara ana humo hi Deus harere bo hyỹ ziknakara. Sinini nikara atahi Deus harere bo hyỹ

ziknakara ana humo hi zinymyryky. Anahumo ihyriziktsokzawy nikymyba.

⁹ Atakta tsimysapyrêta. Imysapyrênikita tu mybarawy ezektsa Deus bo mysioktyhyryk. Asaktsa iharere bo zuba hyÿ mykaranaha, ihumo simysapyrêtsa moziknaha. Deus tuk tahawahi mynapykyryknaha.

¹⁰ Deus Sesus pe niy:

– Ikia zuba tapara ziknapamykysokota tsi-mozik. Merikisedek wata tsi-mozik. Mybarawy ezektsa tysitsumuêhĩ mynakara, koikny bakta tu tawahi mysitsumuêhĩkĩ – Deus niy.

Deus harere tsipinymyrytohinaha.

¹¹ Tapara ziknapamykysokota niy. Hawa Sesus Kiristu Merikisedek wata pahahyrinymyrykyzyky. Hawa ha ty tsihokdaharêna batu ahawabyhy. Ana harere tsihokdaharêna humo batu wabyziu zikaha.

¹²⁻¹³ Tapara Deus harere bo hyÿ tsimykaranahaze hawa batu ihokdaha ahahyrinymyrêtsa. Hawa wasani batu ahahyrinymyry. Hawa batu imysapy batu ahahyrinymyry. Ikiahatsa sibikyhytsa watsa tsimaha. Ibykyhy taje tsotsik pezuku tawata tsimaha. Ibykyhy myzoho bazikboro ikiahatsa iwatsa tsimaha. Aibani zuba ibykyhy siraratsani piboro. Iwaze ikiahatsa Deus soho tsimysihyrinymyrynahatsa watsa ustsakysa zuba pahahyrinymyrykynaha. Ikiahatsa hawa ha ty wasani ahape tu ahasopyk iwatsahi ahamysapyrêtsa tsi-moziknaha. Batu ba hawa tsihokdaharêna batu ahahyrinymyry iwatsahi sibikyhytsa watsa.

14 Aty skaraba Deus harere bo zuba hyŷ mynakara hawaha tsihokdaharēna pinymyryky, iwaze tsimysapyrēta mozik. Asaktsa siypyktsa watsa maha, asahi myzoho piboronaha. Hawa Deus okzeka wasani my sihyrinymyrētsa, hawaha ty batu sapy sihyrinymyrētsa niwatihi. Sispirikporētsa moziknaha. Tahapetu sisopyk iwatsahi sispirikporētsa moziknaha. Iwatsahi siypyktsa watsaktsa kytsa Deus harere piwabyziukunaha.

6

1 Kiristu harere, nawa ha ty botu tsiwaby-naha ana soho bo hi mytsaty mytsaty byitaha! Ana myspirikpowy batu ihokdaha hŷ. Ana myspirikpowy:

– Ahamysapybyitsa tsikykaranaha ana humo hi Deus tuk batu tsinapykyryknaha iwatsahi tsi-moewynaha! Deus harere bo hyŷ tsimykaranaha iwatsahi tsimyspirikpokonaha.

2 Pihik ty myharasusuwy! Utsa kytsa tahatsy-hyrypetsa ty ahaharek humo paik mahaze Deus hyrikoso ahatuk mynapykyryk. Deus siakbatsa nasihyrizikpobazo. Asaktsa Deus harere bo batu hŷ mykaranaha Deus sinini ykarawy bo mysipeha – niy. Ana kino botu tsinymyrynaha abaka usta myspirikpowy tsiwabytoktonahaktsa! Iwaze tsipinymyrybanahaktsa kytsa.

3 Iwatahi ana hi tsihokdaharēna ahabo tsimyt-sasoziukunaha. Katsa hi:

– O Deus ikia tynamytsumuēhīkta tsimahaktsa!
– tsimaha.

⁴ Kiristu harere zimoewynahatsa hawa ja niaha. Tubabatu Kiristu harere ziwabynahaze iharere bo yhỹ niaha. Deus hyrikoso situk niapykyryk.

⁵ Asahi:

– O Deus harere tisapyrẽna hỹ – nikaranaha. Hawa ha ty kytsa batu zik Deus mykaraze, iwaze asa tihi:

– O Deus zikwyrẽnikita my. Ata hi zuba mybo mynasikzo ana ty hi mykara – nikaranaha. Ihumo sipybyrẽtsa.

⁶ Iwaze Kiristu zerekeknaha ihumo batu sispirikpo niaha. Simysapybyitsa nikaranaha batu isty erek batu zikaha. Sesus Kiristu humo mospirikpozonahaze batu zikaha. Nispirikpobyinahatsa tu kytsa watsa asaktsa Deus tse iharapatawyhyta humo pihyrizikykyzonaha. Deus tse pimyjakanaha. Asahi Deus tuk ba zikakpykyknaha.

⁷ Hawa mytsuhuk humo mymywatawyky. Mytsuhuk piokirywynaha. Hyritsik mynawõze siriktsa moziponaha. Iwaze mydisahawyrẽtsa tsi-moziknaha. Iwa Deus nimysapywyky.

⁸ Usa waratok batu isapy my. Tserekrẽna. Towahaditsa zuba mopykyryknaha. Anahi waratok batu mydisahawyky iwa zeka taoketarahoko. Waratok batu sapy hỹ. Na wata asaktsa Kiristu zerekeknahatsa tu Deus sinini ykarawy bo mysipeha.

⁹ – O katukytsa ikiahatsa mekywa tu tsimoziknaha. Asaktsa Kiristu zerekeknahatsa batu si-watsa tsimaha. Kiristu humo ahamysapyrẽtsa tsi-moziknaha. Sesus humo tsimyspirikpotohinaha

– tsimaha.

¹⁰ Iki ahatsa Deus hyriziktsokzawy humo tsikykarana. Tapara ahaturytsa tsiksitsumuēhĩkina. Kiristu tuktsa humo tsipokzitsinaha. Abaka niwatihi Deus tyryktsa mysitsumuēhĩnaha. Iwaze Deus humo ahamypokzitsarētsa tsipiwatawykynaha. Ana humo kino Deus ba zikspiriktsokda iwaze pahasapywykyry. Atakta imysapyrēnikita tu pahasapywyky.

¹¹ Sesus myziksizo iwatsahi taperykynaha. Taperykynahaze tuharapepokzitsikinahaktsa! Tyharape tsumuēhĩtohinahaktsa! Anaeze tu tsimyzi-hikiknaha.

¹² Ahazikabyrihuja! Pykyhytuty ahahyriktsokzawy humo tahaktsa! Kytsa asaktsa tubabatu Deus humo sispirikporētsa babatsa siwatahaktsa! Deus ispe niy:

– Aibani pahasapywyky – niy. Siakubyrisorokrētsa tu ziperykynaha bykyze Deus isapyhanikia ty sibo nyny niy. Siwatsa tsimahaktsa kytsa! Ahakubyrisoroku ja tsimaha.

Hawa ha ty Deus nitsaso atsatu mykara.

¹³⁻¹⁵ Taparakta Abarão iwa niy. Atakta tispikhikrēta. Deus ispe niy:

– Iki pasapywyky. Kazikwy humo atse mopuruk ihumo atsekokatsa sizubarētsa moziknaha. Kaharere wasani atsa tyty mykara – Deus niy. Atakta tsimiharere wabyrēta tu iharere wasani hỹ, atsatu nikara. Abarão iharere bo hỹ nikara. Tapetu isopyk:

– Deus katse ty kabo nyny my – nikara. Tispihikrêta niapykyk. Iwatahi Deus harere humo itse nipuruk. Deus harere wasani nikara. Iwa hỹ.

¹⁶ Katsaktsa tsimytsaso tsihikiknahaze – Myharere wasani hỹ – my iwaze Deus okzeka myharere wasaniha. Katsa hi:

– O Deus ziknyba hawa motsasoko wasani mykara – my. Iwaze kytsa mysoho iharere wasani my. Hawaha motsaso atsatu mykara maha. Iwaze ba zikahapebetsaknaha, wasape nikara.

¹⁷ Deus kino niwatihi tatyryktsa pe:

– Utakta pahasapywyky ikiahatsa katuk ahawahi tsimynapykyryknaha – niy. Ityryktsa bo ziknapamykysoko atahi:

– Kaharere wasani my. Utakta koikny baktatu kaharere atsatu mykara. Kaharere zuba – niy.

¹⁸ Deus mype niy:

– Utakta pahasapywyky – niy. Ata tihizo:

– Kaharere babaka wasani mykara – niy. Ana harere soho batu mytsaty my. Tozeka ja ba harere mykara. Batu ba. Deus ba zikmyspihikbata iharere humo wasani my. Iwatsahi mypunihikrêtsa! Katsaktsa botu Deus pe:

– O myzo ikia humo mysapyrêtsa tsimoziknaha – tsikaha. Iwatsahi taperykynaha! Atakta mymysapywyky, ihumo mysapyrêtsa tsimoziknaha ana hi taperyky iharere humo taperyky.

¹⁹ Deus humo mysapyrêtsa tsimoziknaha, mywahi ituk tsimynapykyryknaha iwatsahi taperykynaha. Iwatsahi mypunihikrêtsa. Iharere humo mykurêtsa. Deus harere humo batu mpyby atahi mymysapywyky iwatsahi

mykurētsa tsimoziknaha. Deus tuk mywahi tsimynapykyryknaha ana hi taperykynaha.

Tubabatu taparaktsa Deus wahoro zubata eze ziknapamykysokonahatsa Deus sapy eze ipokpedawy bo nikaranaha. Atahi tapara ziknapamykysokota anaeze nitsuk hokbowy ty panu hi iokpezawy ty ana bo hi nitsuk Deus bo ziknapamykysoko myraratsa spu Deus bo nyny niy. Kytsa tsyhyryze Deus bo ziknapamykysoko. Sesus niwatihi bijoikpe bo nitsuk. Anaeze Deus bo isapyha ty nyny niy. Anaeze Deus mopykyk naha bo hi nitsuk iwaze isapyha ty nyny niy ziknapamykysokota wata. Abaka Deus baze atahi mytsyhyryze mynapamykysoko.

²⁰ Tapara Sesus bijoikpe bo nido. Myharaze Deus bo niy. Atahi tapara inapamykysokota niyzik. Iwatahi mytsyhyryze Deus bo napamykysoko, anaeze Merikisedek wata ityryktsa tawahi mysitsumuēhīkī. Aibani Deus bo mymyoktyhyryk ana hi taperykynaha.

7

Merikisedek Serusarēhe zipehata Deus bo ziknapamykysota niwatihi.

¹ Abaka Merikisedek soho motsaso. Atakta Serusarēhe Ezektsa bo zipehata niy. Kytsa tsyhyryze Deus bo ziknapamykysoikik. Taparakta Abarão tasukyrytsitsa bo niwatsoroko, nipykze tawahoro bo ziksikiri. Ske buruk Merikisedek zihobyk. Merikisedek ipe niy:

– Deus zuba pasapywyky, isapyrēnikia ty abo nyny my – niy.

² Abarão niwatsorokoze tasukyrytsitsa namy ziaksebaik. Sinamy ty tsapukte buruk tuze iwaze ibo zibiakak. Tsizubarēna ty ibo nyny niy. Inamy mytsyhyrytsa sepyk nawaha estuba ibo nyny niy usta namy ty are niy. Iwa Merikisedek bo zibiakak. Merikisedek zinaro piwatawy tihi:

– Atakta tatyryktsa humo wasani ziknasipehaka – my. Serusarēhe hudikhudikwy ezekta mypehakatsa niy. Serusarēhe hudikhudikwy naro piwatawy.

– Ata humo ihyrytsa sakurētsa moziknaha – my.

³ Deus harere Merikisedekzo soho ty batu tyso. Taje soho ty batu tyso. Tadiritsa soho ty batu tyso. Tapurukwy ty batu tyso. Tahyrikosokdawy ty batu tyso. Atakta Deus tse babata wata niy. Deus bo ziknapamykysoikik. Merikisedek ityryktsa bo tawahi nisitsumuēhīkī.

⁴ Atahi tsimyarerewabyrēta nawa ha ty ahabo motsasoko. Isoho bo mytsatzyiutahaktsa! Abarão mydiri taparakta tu tanamy ty tsapukte buruk zibiakak. Taparaktsa sisukyrytsitsa namy ziakse ana kino nyny niy. Abarão isoho bo mytsaty nikara:

– O atahi tsimysapyrēta my – niy. Iwa mytsaty nikara.

⁵ Tubabatu Abarão tsekokatsa Rewi inarokota Moises ihyrytsa pe:

– Ahatukytsa tahanamy ty tsapukte buruk ahabo pibiakaknaha. Ikiahatsa Deus wahoro zubata eze ziknapamykysonahatsa humo tahanamy ty tsapukte buruk ahabo nyny maha. Sinamy mytsyhyrytsawa sepyk nawa mahaze estuba ahabo nyny maha – niy. Iwa Moises harere papeu

humo ziwatahaka. Rewi hyrytsa tahatukytsa namy ty zikziaksekenaha, namy ty sibo zikzib-iakaknaha. Sizubarētsa Abarão tsekokatsa ni-aha iwatuze tahatukytsa namy ty sibo nyny nikaranaha.

⁶ Merikisedek mekywa tu niy. Atakta batu Rewi tukytsabyita niy, usta mekta tukytsa tu niy. Iwatatu Abarão tanamy ty ibo zibiakak. Inamy mytsyhyrytsawa sepyk nawaha ty estuba myze ibo nyny niy. Tapara Deus Abarão pe:

– Naka ahudikhudikwy mozik. Atsekokatsa sizubarētsa moziknaha – niy. Iwa Deus harere Abarão pe niy. Kyze Merikisedek Abarão pe niy:

– Deus pasapywyky ahumo tsimypokzit-siukrēta – niy.

⁷ Abarão ihyrizikwani ibo nitsaso. Merikisedek tihi:

– Deus pasapywy ahumo tsimypokzitsiukrēta – niy. Aty anaharere motsasoko tsimyharere-wabyrēta hỹ. Atakta isoho motsasoko abazubata kytsa iharere bo ma nikaranaha.

⁸ Kytsa sizubarētsa Deus wahoro zubata eze ziknapamykysonahatsa tahanamy ty sibo nyny mykaranaha. Asaktsa hawa eze mohyrikosok-danaha. Merikisedek batu ata hi meky watu my. Deus harere hi:

– Merikisedek ispitu my – niy. Iwaze Abarão tanamy ty tsapukte buruk ibo zibiakak.

⁹⁻¹⁰ Merikisedek ske buruk Abarão zihobykze batu itsekokatsaka. Rewi itsekoka ipurukbyize, aibani zuba nipuruk, iwaze itsekokatsa Abarão eze tu niapykyryk. Iwaze Abarão tanamy ty tsapukte buruk ibo zibiakakze Rewi Abarão

tsekokatsa tadiri tuk my, iwatahi ata kino niwatihi ibo nyny niy. Ipurukbyita tu tadiri tuk inamy ty Merikisedek bo nyny niy. Atakta tapara ziknapamykysonahatsa Deus wahoro zubata eze sibo abaktsa kytsa sinamy pibiakaknaha. Ata hi Merikisedek bo inamy ty nyny niy.

¹¹ Asaktsa Deus wahoro zubata eze ziknapamykysonahatsa mymyhyrinymyryknaha. Iwatsahi Deus harere bo zuba hyÿ tsimykarannahaze mysapyrëtsa tsimoziknaha ana hi sihyriziktsokzawy maha. Rewi tsekokatsa Deus wahoro zubata eze ziknapamykysonahatsa tu batu sipunihik, Deus harere sihumo tsihokdaharëna. Iwatahi Deus usta ziwatawy atakta mytsyhyryze ziknapamykysokota niyzik. Kiristu ziwatawy. Atahi Deus wahoro zubata eze ziknapamykysokota niyzikze, batu Rewi tsekokatsa watsa, ata hi Merikisedek wata niyzik. Kiristu zikwy mytuk mynapykyryk iwatsahi Deus harere bo hyÿ tsimykarannaha. Ihumo mysapyrëtsa tsimoziknaha.

¹² Rewi tsekokatsa Moises harere humo Deus wahoro zubata eze ziknapamykysonahatsa. Abaka Deus usta ziwatawy, ityryktsa sityhyryze ziknapamykysokota niyzik. Abarão hi atakta koikny baktatu Rewi tsekokatsa sisapyzeyki niyzik. Rewi tsekokatsa humo ba mysapyrëtsa tsimoziknaha ba zikyknaha. Kiristu humo zuba mysapyrëtsa tsimoziknaha iwatahi Deus ziwatawy. Abaka Moises harere humo batu myhyrinymyry tsihikik, Kiristu harere bo zuba hyÿ tsimykarannaha.

¹³⁻¹⁴ Atakta Deus zipehata mybetesatsa mozik

batu Rewi tsekokatsa niy. Deus ipe niy:

– Ikia katyryktsa tsyhyryze kawahoro zubata eze tynapamykysokota tsimozik – niy. Atahi batu Rewi tsekokatsa niy. Atakta Suda tsekokatsa niy. Moises batu tyso Suda tsekokatsa soho:

– Ikiahatsa Deus wahoro zubata eze ziknapamykysonahatsa anaeze myraratsa mysiwezonaha iwaze myraratsa ty Deus bo nyny tsimykaranaha – iwa Moises batu tyso.

Usta ziknapamykysokota Merikisedek wata.

¹⁵ Iwatahi Rewi tsekokatsa Deus wahoro zubata ziknapamykysonahatsa batu ihyriziktsokzaha zikaha. Deus usta zipehata sisapy ziakse. Sesus Kiristu zipehata Merikisedek wata my.

¹⁶ Atahi Deus wahoro zubata eze mynapamykysota niyzik. Kytsa harere humo, batu mynapamykysota niyzik batu sisopykwy humo kino niwatihi mynapamykysota niyzik. Atahi ispitu my, koikny bakta tu iwatahi Deus wahoro zubata eze mynapamykysokota niyzik.

¹⁷ Deus harere isoho papeu humo botu ziwataha:

– Ikia kawahoro zubata eze tynapamykysokota.

Kahyrytsa tsyhyryze tynapamykysoko awahi
tysitsumuēhīkī hỹ,

Merikisedek wata tynakara – niy.

Deus harere papeu humo ziwatahaka.

¹⁸ Asaktsa Moises harere bo yhỹ nikaranaha batu sipunihik, ana harere humo aparakbaha Deus bo ba ziksioktyhyryk. Iwatahi Deus hi:

– Moises sopyk humo ba tsimyzurukunaha. Kaharere, abaka humo zuba hyỹtahaktsa kytsa! – Deus niy.

19 Moises sopykwy humo ba mysapytsa zikyzik-naha. Sesus hi Deus bo mymyoktyhyryk ata humo hi Deus okzeka mysapyrētsa tsimoziknaha, iwatsahi taperykynaha.

20 Deus Sesus ziwatawyze iwahoro zubata eze mynapamykysokota mozik. Atahi:

– Pawatawyhik kawahoro zubata eze mynapamykysokota botu iktsaso atsatu mykara. Utakta koikny bakta tu my kaharere botu iktsaso wasani mykara – niy.

Tapara Rewi tsekokatsa nisiwatawyze iwahoro zubata eze ziknapamykysonahatsa niyziknaha ana harere ty batu tyso nisiny zuba niy. Sesus bo zuba ana harere nitsasoko.

21 Deus harere papeu humo:

– Ikia kawahoro zubata eze tynapamykysokota, kahyrytsa tsyhyryze awahi tysitsumuēhīkī.

Ahyriziktsokzawy batu zikpykba

awahi tynapamykysokota tsimy – niy.

Deus harere wasani my ba meky watu mytsaty tykara.

22 – Nawa ha ty botu iktsaso atsatu mykara – niy. Iwa Deus Sesus pe zuba niy. Iwatahi iharere abaka wasani mykara. Sesus humo zuba ana harere abaka bazimyi wasani Moises Deus harere nitsasoko ana harere wasani niy. Iharere abaka Sesus pe wasani.

23 Rewi tsekokatsa Deus wahoro zubata eze ziknapamykysonahatsa nikaranaha. Ziknahyrikosokzakanahaze mektsatu ziknaharape sapyzekykynaha. Iwa hỹ.

²⁴ Sesus ta mekywa tu my. Koikny bakta tu batu aty tohi zisapyzeka. Sesus zuba tawahi mynapamykysokota my.

²⁵ Iwatahi izikwy humo mysapyrêtsa tsimoziknaha. Katsa Deus pe tsimykaranahaze:

– O myzo Sesus humo myspirikporêtsa iwatsahi abo tsimypamykysokonaha. Ikia humo ka mykurêtsa – tsimaha. Iwaze Sesus humo mysapyrêtsa tsimoziknaha. Atahi tawahi koikny bakta tu. Deus bo mytsyhyryze mynapamykysoko iwatahi Deus bo mymyoktyhyryk hỹ. Ihumo mymytsumuêhĩkĩ iwatsahi mykurêtsa hỹ.

²⁶ Atakta tsimytsumuêhĩrêta. Katsa mypunihikbyitsa tu batu sapy tsimaha. Sesus zikwy humo zuba mypunihikrêtsa tsimoziknaha. Atahi tsimysapyrêta hỹ. Batu zimyi. Isapybara bo batu mytsaty ziky. Kytsa asaktsa hawa sisapybyitsa mykaranaha ba mywa ziky my. Ata hi imysapyrênikita bjoikpe bo nido. Deus tuk tasapy anaeze mynapykyryk hỹ.

²⁷ Pibytuhukutu tapara ziknapamykysonahatsa Deus wahoro zubata eze myraratsa ty ziknasiwezokonahaze. Asahi:

– O Deus mysapybyitsatu tsikykaranaha ikia myraratsa spu humo tymyokzohik. Atyryktsa sisapybyitsa tu nikaranaha humo kino niwatihi tsiokzohik – nikaranaha. Pororo ziknakaranaha.

Sesusta batu siwatsa my. Estuba zuba Deus bo tanury tynyny niy. Mysapybyitsatu tsikykaranaha anahumo hi nihyrikosokda, ba zikyrikosokdazo abaka tawahi ispitu my.

²⁸ Tapara Moises bo nitsaso. Deus kytsa nisi-hyrinymyrykyze taparaktsa iwahoro zubata eze

ziknapamykysonahatsa nisiny. Asaktsa sipuni-hikbyitsa tu zimyikinaha. Bykyze zuba Deus tse babata ziwatawy. Bykyze itse babata pe:

— Ikia zuba kawahoro zubata eze tynapamykysokota awahi tynapamykysokota. Kahyrytsa tsyhyryze awahi tysitsumuēhīkīkta. Ikia babata zuba batu zimyi — niy. Deus harere wasani hỹ. Sesus hi mynamybetesawyky my, tawahi mynapamykysokota my taharere tyhi mynakara.

8

Sesus mytsyhyryze Deus bo mynapamykysoikik.

¹ Sesus Kiristu zuba tapara Deus wahoro zubata eze mynapamykysokota ana hi tsipahahyrinymyry tsihikiknaha. Atahi ipyrirykbyita tsimyharerewabyrēta hỹ. Atahi Deus tuk bijoikpe bo nitsuk, anaeze Deus panuryk taba modyhyky.

² Asaktsa Deus wahoro zubata ziknapamykysonahatsa Deus pokpedawy bo ziknapupukunaha anaeze Deus bo ziknapamykysoikiknaha. Ityryktsa tsyhyryze Deus bo ziknapamykysoikiknaha. Sesusta meky wa tu my. Deus wahoro zubata ata hi kytsa nizuknikinaha anaeze Sesus batu mopykyryk, atahi Deus hudikhudikwy bo bijoikpe eze mynapykyryk. Anaeze hi isapy mozik, anaeze mytsyhyryze Deus bo mynapamykysoikik hỹ.

³ Asaktsa Deus wahoro zubata eze ziknapamykysonahatsaktsa tisapyrēna ty Deus bo nyny ziknakaranaha. Deus hi nisiny iwatsahi kytsa tisapyrēna ty Deus

bo nyny ziknakaranaha, siraratsa humo kino niwathi ziknasiwezokonaha. Iwaze siraratsa ty Deus bo nyny ziknakaranaha. Sesus mytsyhyryze mopamykysokota ustsá ziknapamykysokonahatsa watsa Sesus isapyrēnia ty Deus bo nyny niy.

⁴ Atakta mybarawy ezekta batu ziknapamykysokota my. Ustsá Deus wahoro zubata eze ziknapamykysonahatsakta asakta Moises harere humo zuba yh̄y nikaranaha iwatsahi kytsa tisapyrēna ty Deus bo nyny ziknakaranaha.

⁵ Hawa ha ty bijoikpe eze tu wasani my. Wytyk ezeka hyrikoso zuba my. Deus parik Moises nizuknita atakta ihyrikoso zuba my, ihudikhudikwy baba hi bijoikpe eze tu anahi wasani my. Tubabatu Moises hara tykbaba humo tabete niriktohokoze Deus taparik hyrikoso ziwatawy – Nawaty – niy. Deus ipe niy:

– Kparik ty pykyhytu tyzukni! Kahyrikoso hi abo pawatawy – niy. Ziknapamykysonahatsakta kytsa bo nisitsumuēh̄ik̄naha Sesus bijoikpe eze tu mynamytsumuēh̄ik̄. Atakta mytsumuēh̄ik̄tsa.

⁶ Deus tatse zipehaze ihyriziktsokzawy tisapyrēna ipe niy. Asakta Deus wahoro zubata eze ziknapamykysonahatsa, Rewi tsekokatsa sihyriziktsokzawy tisapyrēna. Sesus Deus tse mysapuhyripyrywyta ihyriziktsokzawy tisapyrēna h̄y. Tubabatu Deus Moises bo nitsasokoze iharere humo tisapyrēna. Deus hi:

– Aparakbaha mysisapywyky – niy. Iwaze ziknapamykysokonahatsa humo nawa ha ty nitsaso astsatu nikara, iwa kytsa nisisapywyky. Sesus bo nitsasoze iharere tisapyrēna, iharere

mymysapywyky. Sesus humo mymysapywyky hỹ. Katsa anaharere bo hyỹ tsimykarannahaze ana humo hi myspirikporẽtsa tsimoziknaha. Ihumo kino niwatihi mysapyrẽtsa tsimoziknaha. Anaharere bo hyỹ tsimykarannahaze Deus tuk mywahi tsimynapykyryknaha iwatsahi mykurẽtsa tsimoziknaha Sesus humo Deus mymysapywyky hỹ.

⁷ Tapara Deus Moises bo nipamykysoko. Anaharere tisapyrẽnaha zeka usta harere ty batu tyso.

⁸ Moises harere humo myzubaha simysapybyitsa niyziknaha iwaze sisoho Deus harere papeu humo ziwatahaka:

— “Aba usta harere Isareu tyryktsa

Sudeutsa bo motsasoko
abaka kaharere humo sispirikporẽtsa moziknaha.

⁹ Tubabatu taparaktsa ahadiritsa bo iktsasoko.

Esito ekze ikxioktyhyryk.

Kaharere sibo iktsasoikik.

Kaharere humo batu hỹ zikaha.

Iwatahi siharere bo kawabybarawa nazukniki” —
Deus niy.

¹⁰ Deus hi:

— Abaka usta harere Isareu itsekokatsa bo motsaso,

abaka kaharere sibo motsaso.
Kaharere humo simysapyrẽtsa moziknaha.

Kaharere bo mytsatyziu mynakaranaha,
kaharere humo ba zikspiriktsokdanaha.

Kaharere bo hyỹ mykaranaha iwa mozihihiknaha.

Asahi kape sisopyk:

“O atazuba Deus my” maha.

Utakta ispe kasopyk:

“O asaktsa katyryktsa hỹ” – my.

¹¹ Nawatsatu kahumo tsipiknynaha.

Iwatsahi situkytsa bo batu sihyrinymyry.

Situkytsa pe – O Deus tsinynahaktsa! – iwa ba ziktsaso.

Nawatsatu piknynaha iwatsahi isty peha peha byitahaktsa.

Kytsa myhyrizikwanibyitsa, myhyrizikwanitsa, nawatsatu iwa piknynaha.

¹² Simysapybyitsa tu nikaranaha

ana soho bo batu mytsatyzo my.

Simysapybyitsa tu ziknakaranaha humo myspiriktsokdabaik.

Simysapybyitsa tu nikaranaha mysiokzohik niy.

Iwa Deus harere papeu humo tatyryktsa soho botu ziwataha.

¹³ Tapara kyka mopykba. Ezytyk isapyzekeny mozik iwaze ibykyka tsimoewynaha. Iwa Deus mype niy:

– Kaharere tapara tuky Moises bo iktsasoko ana bo ka mytsaty mytsaty byitaha! Abaka kaharere bo zuba hyỹ tahaktsa! Iwatsahi ahamysapyrẽtsa tsimoziknaha – Deus niy.

9

Kiristu Deus hudikhudikwy bo nitsuk.

¹ Iwatsahi asaktsa Moises harere bo hyỹ nikaranaha Deus bo:

– O ikia zuba tsamysapyrẽta – pororo ziknakaranaha. Iwa Deus parik eze ziknakaranaha. Ataparik kytsa nizuknikinaha.

² Taparaktsa tahararatsa hwyk ty iparik nizukninaha. Tsapukte buruk panu ty zipokpedawynaha. Nataba panu ipokpedawy eze:

— Deus imysapyrēnikita sapy my — niaha. Anaeze rikatsasapy ouro ty, sidisahawyzozowy kino niwatihi atabete hi atsikara ty Deus bo zozo ziknakaranaha. Zikzibytuhukunaha zozozo ziknakaranaha. Iwa hỹ.

³ Iwaze usta taba ipokpedawy eze:

— Atakta imysapyrēnikita babata sapy my — niaha. Anaka abazubaha niy.

⁴ Anaeze siraratsa wezowy ouro ty zoknihita. Ana bete iokmorēnikia ty Deus bo zikziwezokonaha. Iwaze usta sinamysuk ouro ty zoknihita. Tsiziurēta. Anaeze joporosuk tsibik ouro ty zoknihita ty zik niaha. Mana zinaroko sidisahawy joporosuk eze pokpok niaha anaeze zik niaha. Iwaze taparakta Arõ zozowy ty bita niaha, tubabatu izozowy humo tasakarebaik. Tapara ky Deus harere Moises bo nitsaso iwaze Moises iharere harahare humo ziwatahaka. Harahare petok aha humo ziwatahaka ana harahare humo petokuha sinamysuk eze zik niaha. Iwa. Sinamysuk eze zik niaha.

⁵ Sinamysuk bete sihyrikosotsa sisapyrētsa. Bijoikpe iknyktsa hyrikosotsa. Sinamysuk tahasara harapu bete niapykyryk. Anaeze ziknampamykysokonahatsitsa simysapybyitsa nikaranaha, kytsa kino niwatihi simysapybyitsa nikaranaha, ana soho hi Deus bo nitsasokonaha:

— O Deus mysapybyitsa tsikykaranaha ana humo hi myraratsa tsiksibakanaha sispu bo iktsa

tsimyeze ana humo hi tymokzohik – nikaranaha. Iwaze Deus hi:

– Ahamysapybyitsatu tsikykaranaha ana soho humo hi takyriki ahararatsa ahasapyzeky tsiksi-bakanahaze pahaokzohik – niy. Iwa tisapyrēna hỹ. Abaka ana soho ba pahahyrinymyry.

⁶ Iwaze Moises tukytsa ata parik nizuknibanaha iwaze asaktsa ziknapamykysonahatsaktsa ipokpedawy taba ziknapupuikiknaha. Anaeze tsizubarēna nikymynahaze Deus okzeka sihyriziktsokzawy ziknakaranaha.

⁷ Usta ipokpedawy tabaka taparaktsa ziknapamykysonahatsa tuk estuba zuba ibo ziknat-sukuk. Ba zikzytyhykwa ziktsukuk. Iytyk tsehewywa eze zuba ziknatsukuk. Zinatsukukze myraratsa spu zuba zikorokonaha. Iwaze Deus pe niy:

– O Deus kararatsa kasapyzeky ibeze iwatahi kamysapybyita tu ikykara tsikokzo. O Deus myraratsa ahyrytsa sapyzeky tsiksibanaha iwatahi simysapybyitsa tu nikaranaha tysiokzohik. Abaka myhumo akyri byihuja – nikara.

⁸ Katsa mytsaty tsimykaranahaze anapokpedawy eze taparakta ziknapamykysonahatsaktsa tuk estuba zuba zuruze inatsuk, Deus hyrikoso ana soho nimyhyrinymyryky. Hawa kytsa Deus sapy bo ba zikpupunaha Deus hyrikoso nimyhyrinymyry. Iparik atatuze kytsa Deus bo bijoikpe eze ba zikpupunaha.

⁹ Ziknapamykysonahatsa Deus wahoro zubata eze tuze, sisapyrēnikitsa ty zuba Deus bo nyny nikaranaha. Siraratsa ty kytsa sapyzekytsa Deus

bo nasiwezokonaha. Iwatsatu siraratsa ty nyny nikaranahaze kytsa hi:

– Katsaktsa batu mysapy tsimaha, mysapyby-itsa tu tsimykaranaha – nikaranaha.

Hawa ha ty ziknakaranaha Deus parik eze nimyhyrinymyryky. Aba zuba Kiristu mozumuze iwaze katsa Deus bo tsipomonaha. Ihumo mysapyrëtsa tsimoziknaha.

¹⁰ Moises harere bo yhy nikaranaha. Wastuhu sidisahawy humo batu hauk niaha. Wastuhu siopuwy humo ba zikunaha. Sisopyk tyty tahakpikiknaha iwa ziknakaranaha. Sinury humo zuba siziurëtsa niyzikiknaha, simiywynahatsa nikaranaha, iwa ziknakaranaha. Aibani Deus harere abaka nitsasokoze hawa Kiristu humo zuba mysapyrëtsa tsimoziknaha ana harere hi taperyky.

¹¹ Iwatatu Kiristu izumu. Ata hi ziknapamykysonahatsa Deus wahoro zubata eze nisisapyzesty atahi nimitysumuëhiki.

– Hawa ha ty isapyrënikia ty ahabo nyny my – mykara. Deus bo mytsyhyryze mynapamykysoko! Batu iparik eze tu my, ana hi kytsa nizuknikinaha. Atahi bjoikpe bo Deus tuk tasapy Deus baze niapykyryk anaenze Deus bo mytsyhyryze mynapamykysoko, ana hi tisapyrëna.

¹² Deus tuk tasapyze aparakbaha hi:

– Atazuba mysapyrënikia bo nitsuk. Estuba zuba nitsuk. Siraratsa spu ty batu wabehyryk ny. Hozipyrykza spu pikuzä spu iwa batu wabehyryk ny. Sispu ty Deus bo batu tywatawy ziknapamykysonahatsa Deus wahoro zubata siwatsa ny. Mysapyzesty nihyrikosokda iwatahi taspu

tyty Deus bo ziny. Ispu humo mysapyrētsa tsimoziknaha iwatsahi mywahi Deus tuk tsimynapykyryknaha – nikaranaha.

¹³ Tapara kytsa simysapybyitsa ziknakaranaha, Moises mypehawy bo batu hỹ ziknakaranahaze simysapybyitsa ziknakaranaha. Iwatsahi ziknapamykysonahatsa Deus wahoro zubata eze siraratsa spu ty nisinyzokonaha. Sisopyk humo hozipyrykza spu, pikuza spu, pikuza tsibik ziwezokonaha izohyri ty iwa nisinyzokonaha. Iwaze Deus okze wasani niyziknaha.

¹⁴ Iwa maha zeka Kiristu spu humo mysapyrētsa babatsa tsimoziknaha. Ihumo myspirikporētsa. Kiristu batu ziky tsimysapyrēta zuba. Bazimi. Deus koikny baktatu ihyrikoso ituk mynapykyryk. Atatu nizihikik Deus bo itanyiny niy, mysapyzekenihyrikosokdaze iwaze Deus bo atatu itanyiny niy. Atahi:

– O kazo ziknapamykysokonahatsa awahoro zubata eze siraratsa nisiwezobanahaze kytsa simysapybyitsa nikaranaha ikia hi:

“O asaktsa wasani maha siraratsa kytsa sapyzekenisibanaha iwatahi wasani maha” tsiktsasoko. Abaka kaspu humo aparakbaha simysapyrētsa babatsa moziknaha, sisapyzekenikyrikosokda iwatahi ikia ispe:

“O ahamysapyrētsa babatsa tsimaha katsespu humo tsimy” – Kiristu niy.

Mysapyrētsa tsimoziknaha iwatsahi mysapybyitsa tsikykaranaha mytsaty mytsaty byijataha. Hawa Deus koikny baktatu itsyhyryze tarabajaziu tsimykaranaha ana humo hi mytsaty tsimykaranaha.

Abaky Deus harere.

15 — Asaktsa Moises harere bo yh̃y nizihikiknaha tsahi tapara iharere bo batu h̃y ziknakaranaha iwatsahi zimyinahatsa tu nikaranaha. Kiristu simysapybyitsa nikaranaha humo nihyrikosokda. Abaka Sesus Kiristu hyrikosokdawy humo Deus simysapybyitsa nikaranaha mysiokzohik. Iwatahi Deus harere abaky mybarawy ezeaktsa bo niy. Ikiahatsa kawatawyhytsa tsimaha. Katuk ahawahi tsimynapykyknaha, Kiristu mytsapuhyripyrywya ahasapyzeka nihyrikosokda iwatsahi ahamysapyr̃etsa babatsa tsimoziknaha — niy. Iwa Deus Kiristu humo mymysapywyky.

16-17 Kyze aty my zeka:

— O uta mohyrikosokdaze kahyrikyky ty abo nyny my — my. Mohyrikosokdaze ihyrikyky ty usta bo nyny my za. Atatuze usta inamy batu ziake. Ispitu zeka usta namy ba ziake. Aty tsasoho tihi:

— Atakta nihyrikosokda — niy. Iwaze zuba kytsa piwabynahaze ihyrikyky ty usta piakse.

18 Taparaktsa mydiritsa siakbatsa siraratsa nis-ibanaha. Iwaze zuba Moises harere bo yh̃y nikaranaha.

19 Moises Deus harere aparakbaha bo nitsasoko iwaze pikuza tsibik zibeze hozipyrykza kino niwathi zibeze sispu ty pihik ty tsakykyha niy. Joporosuk bo su niy. Iwaze iparikiha sazik ty isopo inarokoha nizokbatsi panu hozipyrykzazi nitsazikke isopo ity sok niyze izi tsitsairihar̃ena

niyzik ispu humo. Kyze kytsa siharek bete su niy, ipapeu humo kino niwatihi siraratsa spu ty su niy.

²⁰ Kytsa bete, ipapeu humo kino niwatihi sispu ty su niyze ata hi:

– Deus harere mybo nitsaso iwatsahi ana harere bo yhỹ tsimahaktsa! Ana spu ahaharek bete su myze iwaze ikiahatsa Deus harere bo yhỹ tsimaha – niy.

²¹ Iwata Moises Deus parik bete siraratsa spu ty su niy. Iparik isapyrẽnikia ty sibete niwatihi siraratsa spu ty susu nikara.

²² Asaktsa Moises harere bo yhỹ nizihikiknaha siraratsa ty ziknasibaikiknaha. Iwaze kytsa meky watu niyziknaha siraratsa spu humo. Deus anabo hi iktsa niyze bazik takyri kytsa simysapybyitsa nikaranaha sispu humo nisiokzohik. Sinamy kino niwatihi siraratsa spu nisiharasusukuze tisapyrẽna niyziknaha. Siraratsa sibaha byizeka batu sispu, iwaze Deus kytsa simysapybyitsa tu nikaranaha batu isty okzohik. Iwa hỹ.

Sesus Kiristu mysapyzoky nihyrikosokda iwatahi Deus mysopyksapybyitsa tsimykaranaha mymyokzohik.

²³ Ziknapamykysonahatsa Deus wahoro zubata eze siraratsa ziknasibaikiknaha, aparakbaha sapyzoky ziknasibakanaha. Asaktsa bijoikpe bo Deus tuk tawahi mynapykyryknaha ispu meky watu maha. Katsaktsa Kiristu spu humo, mysapyrẽtsa tsimoziknaha, ana humo hi bijoikpe bo mywahi Deus tuk tsimynapykyryknaha.

²⁴ Iwatahi Kiristu Deus iparik bo batu paku. Anaeze ky bo kytsa suknihi bo ba ziktsuk. Iparik

hyritywata bijoikpe eze tu, batu paku. Bijoikpe bo Deus tuk tasapy. Anaeze hi Deus bo mytsyhyryze mynapamykysoikik iwa mymytsumuēhīkī.

²⁵ Iytyk tsehewa estuba zuba taparakta ziknapamykysonahatsa Deus wahoro zubata eze imysapyrēnikita babata sapy bo nitsuk. Nitsukze siraratsa spu zebykyrykze. Deus ana bo hi iktsa niyze aparakbaha simysapybyitsa nikaranaha nisiokzohik. Kiristu anabo batu paku atatu Deus bo itanyny mykara. Estuba zuba Deus tuk tasapy iwatahi ibo itanyny niy.

²⁶ Ziknapamykysokonahatsa wa horokba ziknakaranahatsa tu nihyrikosokdaikiknaha. Mybarawy nizuknize sinini mynakara batu iwa hỹ. Estuba zuba nihyrikosokda ba zikyrikosokdazo. Mybarawy epykbyize Kiristu wytyk bo inasikze nihyrikosokda iwatahi izumu imysapybara zimoewyba.

²⁷ Nawatsatu tsimyhyrikosokdanahaze Deus metutu mymysapy.

— Ata hi my:

“Asaktsa wasani my. Utsa batu simysapy my” — my. Iwa myhuak ty mybo nyny my, asaktsa Sesus harere bo yhỹ ahabyitsaktsa sinini ykarawy bo mysipehahik.

²⁸ Kiristu niwatihi estuba zuba nihyrikosokda. Deus bo atatu itanyny niy. Taparakta Deus wahoro zubata eze siraratsa nisiba siwatsa Sesus mysapyzekenihyrikosokda. Iwaze mysapybyitsa tsikykaranaha Deus pahaokzohik. Sesus botu nihyrikosokda mybarawy bo myziksizo. Myziksizoze batu mysapybara bo baziky, myziksizoze izikwy humo mysapyrētsa tsimoziknaha. Abaka

atahi mytaperyky hỹ, ihumo mysapyrẽtsa tsi-moziknaha.

10

¹ Kyze asaktsa Moises harere bo yhỹ nizihikik-nahaze Deus harere tsikaeni zuba sihyrinymyry. Deus wahoro zubata eze taparakta tuk ziknapamykysonahatsa siraratsa nisibaikiknaha, iwatsahi pororo ziknakaranaha kytsa sitsyhyryze nisibakanaha iwatsa tu kytsa batu sispirikpo.

² Simysapyrẽtsa niyziknaha zeka batu tahapetu sisopyk:

– O katsaktsa batu myku imysapybara humo tsikykarannahatsa hi mysukatsihikrẽtsa tsimykaranaha – nikaranaha. Simysapyrẽtsa niyziknaha zeka siraratsa tyka beze beze byitaha.

³ Iytyk tsehewa tu siraratsa nisibakanaha pororo ziknakaranaha, tahamysapybyi humo nikaranaha iwatsahi siraratsa nisibanaha. Iwatsatu batu tyso:

– Abaka mysapyrẽtsa. Deus okzeka wasani tsimaha mysapybyitsa tsikykaranaha pahaokzohik – nawa batu tyso. Asahi:

– Katsa tsimynahatsa. Hawa mysapybyitsa tsimykaranaha – nikaranaha.

⁴ Pikuza spu hozipyrykza spu kino niwatihi simysapybyitsa ziknakaranaha anahumo hi batu siokzo.

⁵ Iwatahi Kiristu izumu. Ziokpyryze Deus pe niy:

– O kazo mybarawy ezektsa siraratsa mysibanahaze akubyita tsimykara.

Mybarawy ezektsa tisapyrēnikia ty abo nyny mahaze akubyita tsimy kara.

Kanury tsipiky myze kabo nyny tsimy iwatahi mybarawy ezekta mozik.

⁶ Mybarawy ezekta siraratsa mysibaze imysapybyitsa nikara

naha humo, akubyita tsimozik.

Aokze siraratsa nikorobanahaze simysapybyri humo akubyita tsimozik.

⁷ Iwatahi utakta: “O Kazo mybarawy bo mynasik iwatahi aharere bo zuba hyĩ mynakara.

Iwa my. Hawa kaso ho botu papeu humo ziwatahaka” – niy.

Iwa Kiristu tazo pe niy.

⁸ Tapara iwa niy:

– Mybarawy ezektsa siraratsa ziknasibakanahaze Deus iakubyita ziknakara. Tisapyrēnikia ty ibo nyny ziknakaranahaze iakubyita niyzik. Deus okzeka siraratsa ziknasiwezobaiknahaze iakubyita ziknakara. Kytsa simysapybyitsa nikaranaha humo siraratsa nisibanahaze iwatsahi simysapybyitsa nikaranaha ana humo hi Deus nisiokzohik iwata tu iakubyita nikara – niy.

Iwa Sesus Deus soho niy. Tubabatu Moises taharere humo nisipehahik iwata tu Deus sisopyk humo iakubyita ziknakara.

⁹ Iwaze Kiristu hi:

– Uta wytyk bo mynasikze aharere bo zuba hyĩ mynakara iwaze kahumo akurēta tsimozik – niy.

Iwa myze mymywatawy abaka siraratsa wezo humo niwazuba mykara.

– Deus harere bo pykyhytu zuba hyĩ mynakara iharere bo zuba hyĩ mynakara iwaze siraratsa ty ka abaka beze beze byitaha tsimaha. Myzubaha sapyzekeny mohyrikosokda – niy. Iwatahi Deus mysapybyitsa tsikykaranaha mymyokzohik Kiristu mysapyzekeny nihyrikosokda.

¹⁰ Sesus Kiristu Deus nizihikik naha humo zuba hi hyĩ nikara iwa zikzuruku. Ikahaty zuba nihyrikosokda iwa Deus bo atatu itanyny niy. Nihyrikosokdaze mysapybyitsa tsikykaranaha Deus ihumo mymyokzohik. Iwatsahi ihumo mysapyrētsa tsimoziknaha, ana hi Deus mybo piwatawy.

¹¹ Zikbyituhukutu Deus wahoro zubata eze ziknapamykysokonahatsa siraratsa ziknasiwezoikiknaha. Deus wahoro zubata eze ziknariktoriktohokonaha tahahyrikiziksokzawy humo zuba ziknakaranaha. Siraratsa nasiwezokonahaze kytsa simysapybyitsa nikaranaha batu isty okzohik. Deus siraratsa koro bo iktsa nikaraze kytsa simysapybyitsa nikaranaha ana humo hi batu isty okzo.

¹² Sesus Kiristuta ikahaty zuba nihyrikosokda. Nihyrikosokdaze kytsa simysapybyitsa nikaranaha Deus Sesus humo nisiokzohik. Sesus Deus bo atatu itanyny niy. Deus baze ipanuryk taba mynadyhyky. Anaeze tawahi mynapykyryk.

¹³ Anaeze hi Sesus tasukyrytsitsa mysiperyky, iharere bo yhyĩ mykaranaha, ana hi piperyky. Deus botu ipe niy:

– Uta kazikwy humo asukyrytsitsa aharere bo hyĩ mykaranaha – niy.

14 Ikahaty zuba nihyrikosokda. Katsa mysapybyitsa tsikykaranaaha ihumo nimyokzohik iwatahi nihyrikosokda. Ihumo mywahi mysapyrëtsa tsimoziknaha.

15 Deus hyrikoso ana ty hi nimyhyrinymyryky. Tapara Deus harere papeu humo ziwatahaka:

16 – Aibani uta katyryktsa kazikwyo humo simys-apyrëtsa moziknaha.

Abaka sibo motsasoze kaharere bo mytsaty tynakaranaha.

Abaka sakurëtsa kaharere bo mytsatyziyu my-nakaranaha.

Kaharere humo ba zikspiriktsokdanaha – niy.

17 Kyze Deus hyrikoso iwa ziwatahaka.

– Hawa ahamysapybyi tsikykaranaaha ana bohi ba mytsaty ziky.

Hawa ahasopyksapybyri tsikykaranaaha soho ba mytsaty ziky – Deus hyrikoso niy.

18 Mysapybyitsa tsikykaranaaha Deus taokaniki abaka batu. Iwatsahi mysapybyitsa tsikykaranaaha humo siraratsa ba ziksiwezozonaha. Sesus Kiristu nihyrikosokdaze mysapyzekeniyzik iwatahi Deus mymyokzohik mysoho ty batu tywaby. Atahumo hi mysapyrëtsa tsimoziknaha.

O kytsa Deus bo tsimahaktsa Sesus Kiristu humo.

19 Iwaze hi:

– O katukytsa mysapyrëtsa tsimoziknaha. Mypunihikrëtsa tsimoziknaha. Deus bo tsimypamykysokonahaze katsa ipokso batu mpybyby tsimaha. Sesus Kiristu mysapyzekeniyzyk.

nihyrikosokda iwatsahi Deus imysapynikia bo tsimypupunaha. Hawa taparaktsa:

“Atakta imysapyrēnikta babata sapy bo” ziknapupukunaha siwatsa Deus bo tsimynapamykysokonaha. Batu ipokso mypyby – tsimaha.

²⁰ Taparakta ziknapamykysonahatsa tuk ana ipokpedawy panu ana bo hi pororo ziknakara iwaze Deus bo ziknapamykysoikik. Katsa Sesus mysapyzekenihyrikosokda naha humo Deus bo tsimypamykysokonaha. Nihyrikosokdaze ipokpedawy panu nisykbaik abaka Sesus humo Deus bo tsimaha. Atakta ispituzo iwatahi, iske ezytyk wa, atakta Deus ske tsimaha. Iwatsahi ibo tsimynapamykysokonaha hỹ.

²¹ Sesus mynapamykysokota my. Atahi abazubata my. Deus tyryktsa mysitsumuēhĩkĩ, ata kino mymytsumuēhĩkĩ hỹ.

²² Iwatsahi Deus bo tsimypamykysonahaktsa! Ihumo tsimyspirikpobabanahaktsa! Ba ahape tu ahasopyk:

– Tozeka ja kasapybyita mykara. Kamysapyrēta ja. Batu kanyhy – iwa batu tyso. Sesus humo mysapyrētsa hỹ. Hawa mymytsyhyrytsapik nahawa iwaze myziurētsa tsimoziknaha, iwatsa katsa ihumo mysapyrētsa tsimoziknaha.

²³ Hawa ha ty Deus motsasoko atsatu mykara. Katsa hi:

– Deus mymysapywyky ituk mywahi tsimynapykyryknaha – tsimaha. Batu tyso:

– Deus ja mymysapywy. Tozeka ja ituk mywahi tsimynapykyryknaha. Batu mynyhy – iwa batu tyso.

Deus harere bo zuba tsimykaranaha, iwatsahi iharere humo tsimyspirikpotohinahaktsa kytsa! Iharere tsiperynaha.

24 Tyharape pokzitsikinahaktsa! Tyharape tsumuēhīnahaktsa! Hawa Deus humo mysapyrētsa tsimoziknaha iwatsahi ustsā kytsa tysisapywykynaha! Katsa sihumo mypokzitsirētsa iwatsahi tysisapywykynahaktsa.

25 Tynakykpyknahaktsa kytsa! Wastuhu Sesus tuktsa zukbyitsahi tsiwabynaha. Ba siwa zikaha. Tynakykpyknahaktsa iwatsahi Deus harere ty tanymyryky. Tyharape hokusukninahaktsa! Mypehatsa atsoko myziksizo iwatsahi taperyky iwaze tynakykpyknahaktsa!

26 Abaka Deus harere wasania ty tsiwabynaha. Ana harere bo hi hyĩ tsimykaranaha tsa tu batu ma zikaha, iwaze Deus myhumo taokanizo. Iwatsahi katsa Deus pokso mypybyrētsa tsimozikzonaha. Iwaze batu mysapyzo, iwatatu Sesus mysapyzēky nihyrikosokda iwatsahi batu myhuakak mysapybyi humo tsimynakaranaha.

27 Hawa Deus mykara ana pokso hi mypybyrētsa. Katsa iharere bo hyĩ aha byizeka sinini tsimykaranaha. Iwaze Deus mymypehanaha taperyky. Hawa mykpyri piwezonaha waha sinini tsimykaranaha.

28 Tubabatu asaktsa Moises harere bo batu yhyĩ niahaze ustsā kytsa nisibaiknaha. Kytsa petoktsa hawazeka harakykbyihitsa nitsasokonahaze:

— O atakta isapybyitatu nikara, Moises harere bo batu hỹ niy — nikaranaha. Kytsa atsatu nitsasokonaha zeka iwaze ata maku zibezēnaha.

Kytsa ihumo batu simypokzitsiu iwatsahi zibezenaha.

²⁹ Abaka kytsa siwatsa maha, asahi Deus tse humo batu siharereziu. Deus botu ispe:

– Ahamysapyrëtsa tsimoziknaha. Katse ahasapyzeken nihyrikosokda ahamysapybyitsa tsikykaranaha Sesus humo zahaokzohik iwatsahi ahamysapyrëtsa tsimoziknaha – niy. Asaktsa katse harere bo batu hÿ niaha. Asahi:

– O Deus atse nihyrikosokda katsaktsa ihumo batu mospirikpo, iharere bo batu hÿ tsimaha – mykaranaha. Iwa niahaze Deus hyrikoso soho pisapybyikinaha. Ihyrikoso sihumo tsimypokzitsiukrëta my, asaktsa ihumo pisapybyikinaha. Iwatsahi sinini mykaranaha. Kytsa Moises harere bo batu hÿ nikaranaha sinini nikaranaha. Asa hi Deus hyrikoso zisapybyrikinaha sinini mykaranaha hÿ.

³⁰ Hawa Deus tyryktsa tuk mykara iwa myhyrinymyrëtsa. Deus harere papeu humo botu ziwatahaka:

– Tubabatu utakta katyryktsa mysitsapusare icy.

Abaka batu.

Asaktsa kaharere bo hyÿ mykaranaha zeka, sisukyrytsita pokso mysibetesaka.

Asaktsa zisapywykynaha isapyrënikia ty sibo nyny my.

Uta ispe my:

“Ikiahatsa tsisapywykynaha my”.

Utsa kaharere bo batu hÿ mynakaranaha.

Utakta ispe my: “Ikiahatsa batu mysapy tsikykaranaha” my.

Simysapybyitsa tuze sinini ykarawy bo
mysipehahik – niy.

Iwa Deus harere papeu humo botu ziwatahaka.

³¹ Deus koikny baktatu tawahi mynapykyryk.
Atakta myhumo takyriki zeka sinini tsimaha.
Wasani tsimyzurukunaha zeka ihumo batu
mypyby!

³² Hawa tsikykaranaha bo mytsaty tsimaha.
Tapara Deus wasania ty tsiwabynahaze ana humo
hi hyÿ tsikykaranaha. Deus hyrikoso ahatuk
niapykyryk. Asaktsa Sesus humo batu sispirikpo
pahasininiwykynahaze tsihokdaharëna hÿ. Iki-
hatsa ahakubyrisorokrëtsa tsikyzyknaha.

³³ Utsa kytsa Sesus harere bo batu hÿ
mykaranaha pahasapybyikinaha, myzubaha
bo pahasapybyikinaha. Iwaze kytsa okzeka
sihumo sinini tsikykaranaha. Kytsa sizubarëtsa
ana bo hi iktsa nikaranaha. Iwaze ikiahatsa kytsa
tysitsumuëhñnaha asaktsa sinini mykaranaha
tysitsumuëhñkñnaha. Tsimyhyrikosokdanaha zeka
batu ahapyby.

³⁴ Ahatukytsa Sesus humo sispirikpo ana
humo hi sakyriukrënikitsa hurukwy bo kytsa
mysipeha iwatsahi tsiknasisukpararenaha
sihumo ahamypokzitsirëtsa iwatsahi sibo
tsiknakozorenaha. Ahasukyrytsitsa ahanamy
ziaksenahaze ahakurëtsa tsikyzyknaha. Ikiyahatsa
tahi:

– Deus mymysapywyky isapyrënikia ty mybo
nyny my, bijoikpe eze ituk tsimynapykyryknaha
mywahi ituk tsimynapykyryknaha. Ana hi tis-
apyrëna hÿ. Mynamy aiba tohi zuba myworoba

Deus mybo nyny mahaka ana ka batu hawa tohi ziky tawahi mynapykyryk – tsimaha.

³⁵ Iwatsahi ahapunihikrětsaktsa kytsa! Ahapunihikrětsa tu zeka Deus tisapyrěna ha ty ahabo nyny my.

³⁶ Hawa ha ty Deus mozihikik pykyhytu tahaktsa! Ahakubyrisorokoktsa! Iharere bo hyỹ tsimaha zeka ahapunihikrětsa tsimoziknaha. Iwaze Deus isapyrěnikia ty botu ahabo nitsasoko anatyhi ahabo nyny my.

³⁷ Deus harere papeu humo:
– Aibani zuba atakta myziksizo.
Iokboha zuba pykaremyny.

³⁸ Kahyrytsa kahumo mospirikpotohinaha iwatsahi katuk tahawahi mynapykyryknaha. Kahumo sispirikpo byizeka sihumo batu kaku – Deus niy.

Nawa Deus harere papeu humo ziwatahaka.

³⁹ Katsa Deus humo myspirikporětsa. Batu aty tohi mysoho tihi:

– O asaktsa Deus humo batu sispirikpo iwatsahi sinini ykarawy bo mykaranaha – iwa batu aty tohi mysoho ba ziktsaso. Katsa Deus humo myspirikporětsa iwatsahi ituk mywahi tsimynapykyryknaha. Mysapyrětsa tsimoziknaha. Iwa hỹ.

11

Taparaktsa Deus humo sispirikporětsa nikaranahaze hawa nikaranaha.

¹ Kyze Deus harere bo hyỹ tsimykaranaha iwatsahi ihumo myspirikporětsa iwaze hawa ha ty

taperykynaha atsatu mybo nyny my. Ihumo myspirikporētsa mypetu mysopyk:

– Hawa ha ty Deus bo tsikzapykykynaha anatyhi mybo nyny my – tsimaha.

² Tubabatu taparaktsa Deus harere bo hyỹ ziknakaranaha ihumo sispirikporētsa. Iwatahi Deus sisoho ziknatsasoko:

– O asaktsa kaokzeka simysapyrētsa – niy.

³ Deus harere bo hyỹ tsimykaranaha zeka taharere eze mybarawy nizukni, ana hi myhyrinymyrētsa. Aba ibo iktsa tsimykaranaha nizukni. Zinyhabara humo kino nizukni. Taparaka batu tsarawyky iwaze hi tsizubarēna nizukni.

⁴ Aba Abeu soho bo mytsaty my, atakta Deus harere bo hyỹ ziknakara ihumo tispirikporēta hỹ. Atahi Deus isapyha ty Deus bo nyny niy. Iziky kino niwatihi isapyha ty Deus bo nyny niy. Abeu Deus bo nyny niy wasani niy. Atahi Deus humo tispirikporēta hỹ iwatahi Deus ipe niy:

– Ikia kaokzeka wasani tsimy – niy. Iziky bo batu tyso. Atakta Deus humo batu ispirikpo iwatahi isapybara ty ty nikara. Abeu nihyrikosokda. Tubabatu nihyrikosokda iwatahi iharere humo batu myspiriktsokdahu, Deus humo ispirikpota babata niy.

⁵ Aba Enoke soho bo mytsaty my, atakta Deus harere bo hyỹ ziknakara ihumo tispirikporēta hỹ. Iokzahabyitatu Deus bo nido, Deus zikwy humo hi nido. Itukytsa batu ity nyzo niaha, Deus bo botu nido. Tapara idobyize Deus isoho tihi:

– O ata humo kakurēta – niy.

⁶ Katsa Deus harere bo batu hỹ tsimykaranaha, iharere humo mospirikpo byizeka myhumo batu iaku. Katsa ibo tsimypamykysonahaze mypetu mysopyk:

– O Deus koikny baktatu my, myhumo tsimypokzitsirētsa mymysapywyky hỹ ana humo hi myhyrinymyrētsa – tsimaha. Iwaze myhumo tsakurēta my.

⁷ Aba Noe soho bo mytsaty my Deus tihi:

– Mybarawy ezektsa pihik humo mysiharazuzukbaik iwaze mysiakbabawyhik – niy. Ana soho ziwaby Noe hyỹ niy. Hyritsik batu inyhy iwatatu Deus harere bo yhỹ niy. Tsaraha puētsikbyita nizukniki iwaze ioke ihyrytsa ahatsa sirehetsa moziknaha. Noe taoke zuba, tahyrytsa tuk Deus harere bo hyỹ nikaraze ustsya kytsa iharere bo batu hỹ ziknakaranaha ziwatawyky. Iwatahi Deus hi:

– O ikia kaokzeka wasani tsimy – niy.

⁸ Aba Abarão soho bo mytsaty my. Deus ipe niyze:

– Nabo meky botu tsikasapykta! Nabokta! – niy. Hyỹ niy. Inyhybyita tu mekybotu Deus harere humo niukuru, iwatahi ihumo tispirikporēta niukuru.

⁹ Kyze anabo zumu. Ana soho Deus tihi:

– Naka asapy mozik – niy. Ana bo zumuze isukmota wata niukuru. Batu wahoroko niy. Siraratsa hwyk iparik niy, tatse Isake tuk niapykyryk, itsekoka Sako kino niwatihi iparik eze niapykyryknaha. Deus ispe niwatihi:

– Naka ahasapy mozik – niy. Deus harere bo hyĩ nikaranaha ihumo sispirikporẽtsa iwatsahi iparik eze niapykyryknaha.

¹⁰ Abarão ihudikhudikwy eze ziperyky, anaeze hi Deus mozukni anaeze hi tisapyrẽna ana kino ziperyky. Anaka ba zikokda.

¹¹ Aba Sara soho bo mytsaty my. Deus ipe niy:

– Tsiktsaikbatatsa tu tsipabykyhy – niy. Deus harere bo hyĩ ihumo tispirikporẽtatsa iwatatsahi tabykyhy.

¹² Ibarikta Abarão nitsaikbata Deus harere humo ioke tabykyhy. Itsekokatsa sizubarẽtsa niyziknaha. Hawaze itsekokatsa my. Batu aty tohi ihyrinomyry, byrisoiktsa watsa, batu myhyrinomyry, nimyra hyritywaha niwatihi tsizubarẽna hiba, ba ziksiwatawynaha.

¹³ Deus humo sispirikporẽtsa Abarão, Isake, Sako ahatsa iwa Deus humo sispirikporẽtsa batabatsa. Deus botu ispe niy:

– Anaka ahasapy mozik – niy. Iwatsahi ana soho hi taperyky. Tahatuktu sisopyk:

– Deus harere humo naka mysapy mozik mykaranaha. Mytsekokatsa naka sisapy mozik iharere humo hĩ – nikaranaha. Iwa Deus harere bo hyĩ nikaranaha ihumo nispirikpokonaha iwatsahi sakurẽtsa niyziknaha. Deus harere nitsasokoze atsatu mykara ana humo hi sihyrinomyrẽtsa iwatsahi sakurẽtsa moziknaha.

– O katsaktsa mybarawy eze tsimypykyryknaha tuze mysukmotsa tsimaha. Kasapy bo tsipiharamunaha zuba – niaha. Nihyrikosokdana-haze ana humo hi batu sisukmo iwatsa tu Deus harere humo sakurẽtsa.

¹⁴ Asaktsa motsasoikiknaha:

– O kahudikhudikwy tsipiharamunaha zuba – mykaranaha usa hudikhudikwy taberiki.

¹⁵ Tahasapy ekze inaonaha tsa hi batu mytsaty zikaha. Tahasapy bo mytsaty mykaranaha zeka iwaze zikzisionaha. Batu ihokdaha.

¹⁶ Asaktsa usa hudikhudikwy taberiki, ana bo hi mytsaty nikaranaha. Anahudikhudikwy bi-joikpe bo tisapyrēna. Deus hi anahudikhudikwy sibo nyny my. Deus sihumo batu sikpyby. Ipe nikaranahaze:

– Katsaktsa Deus hyrytsa tsimaha, ihumo myspirikporētsa – nikaranaha. Deus ana harere bo yh̃y niy.

¹⁷⁻¹⁸ Aba Abarão soho bo puētsik mytsaty my. Abarão tatse ty Deus bo nyny niy. Deus botu ipe niy:

– Atse mopurukze ihumo atsekokatsa sizubarētsa maha – niy. Yh̃y nikara iwatahi ana harere humo hi itse nipuruk. Kyze Deus Abarão niyze hawa kahumo iakparawy babata pinymyry tsihikikze, iwatahi atakta kaharere bo ma my zeka pinymyry tsihikik. Iwaze Deus ipe niy:

– Atse ikahatahi tsibezehikta! – niy. Iwa niyze – Atakta kahumo tsimypokzitsiarēta babata – mytsaty nikara. Iwaha humo Abarão ihumo iakparawy pihyrinymyryky. Deus ipe niyze:

– Atse ikahatahi tsibezekta, Abarão iharere bo hỹy niy.

¹⁹ Tatse asiba zibeze tatuktu isopyk:

“O Deus katse Isake mynahyritzikpowy” – niy. Abarão Deus harere bo hỹy niy ihumo tspirikporēta babata my, ana bo Deus nikozoze ipe niy:

– Niwazubakta! – niy. Iwaze Abarão tatse tawahoro bo zisihyrykzo. Atahi inahyryzikpo tawata niy. Iwa Abarão tatse Deus bo nyny niy, hawa ihumo tispirikporêta babata ziwatawy.

²⁰ Aba Isake soho bo mytsaty my. Atakta Deus harere bo hyỹ nikara ihumo tispirikporêta iwaze tahyrytsa pe:

– Deus pahasapywyky, bykyzehu isapyrënikia ty ahabo nyny my – niy. Iwa ihyrytsa Sako Esau ahatsa bo nikara.

²¹ Aba Sako soho bo mytsaty my. Atakta Deus humo tispirikporêta zumuzakaze Deus pe niy:

– O ikia zuba amysapyrënikita ahumo kakurêta hỹ – niy. Nitsaikbata tu tazozowy humo taty-huziwy niy. Sako tatsekokatsa pe:

– O Deus isapyrënikia ty ahabo nyny my – niy. Iwa Sose hyrytsa pe niy.

²² Aba Sose soho bo mytsaty my. Atakta Deus harere bo hyỹ nikara ihumo tispirikporêta nikara zumuzakaze tatukytsa pe:

– Isareu tsekokatsa Esito ekze tsinaon-ahaze, kapoiktsa tysizozikyknaha nabo kahudikhudikwy bo tu tysiytyknaha – niy.

²³ Aba Moiseszo soho bo mytsaty my. Asaktsa Deus harere bo hyỹ ziknakaranaha ihumo sispirikporêtsa iwatsahi tahatse ziokpitsĩhiknaha. Esito ezektsa pehakatsa tihi:

– Sudeutsa makuskyrytsa mopuruknahaze tysibanaha! – niy. Iwatatu Moises zo ihumo batu pyby. Itse tsiziurêta iwatsahi byzoje harakykbyihi zirahaze tabykyhy ziokpitsĩnaha.

²⁴ Aba Moises soho bo mytsaty my. Atakta Deus harere bo hỹ ziknakara ihumo tispirikporēta. Esito ezektsa ipe sisopyk:

– Abazubata ste tatse tu tsimy – nikaranaha. Taypykze ana harere batu iakparawy. Deus harere bo hỹ nikaraze itukytsa bo iakparawy.

²⁵ Situk sinini ziknakara. Imysapybara tu batu h̃y nikara, batu tabo zuba ziknakara. Deus bo zuba ziknakara iwatahi tatukytsa tuk sinini ziknakara.

²⁶ Batu tapetu isopyk:

– O Esito eze tu mynapykyryk zeka kanamy tsizubarēna h̃y my – iwa batu tyso. Deus tyryktsa nisitsumuēh̃i tsihikik h̃y. Iwatahi tatukytsa harere bo batu h̃y nikaranahaze Kiristu wata niyzik. Kytsa iharere bo kino niwatihi batu h̃y nikaranaha, Deus tyryktsa nisitsumuēh̃i zeka tsakurēta h̃y niy. Inamy tsizubarēna humo tsikaeni zuba iakparawy. Iwatahi Deus ziperyky:

– O atahi isapyrēnikia ty kabo nyny my – ana humo kino tsihyrinymyrēta niy.

²⁷ Deus harere bo hỹ nikara ihumo tispirikporēta tu Esito ekze niparak. Ispehatsa kyriwy humo batu ipyby. Deus harere bo zuba hỹ nikara ihumo tispirikporēta tsakurēta. Deus bo mytsaty ziknakara nawa zikzuruku iwatatu Deus bo batu iktsa niy, isoho humo mytsaty ziknakara.

²⁸ Moises Deus harere humo hỹ nikara ihumo tispirikporēta iwaze Isareu tsekokatsa pe:

– Bijoikpe iknykta Esito ezektsa hyrytsa taparaktsa mysiba. Iwatsahi hozipyrykzatsa spu ty ahahokbowytsa bo susu taha. Iwaze bijoikpe iknyktsa iharapu taba my ahahyrytsa taparaktsa

batu mysiba ahahyrytsa mysiharamu zuba. Hozipyrykzatsa spu bo iktsa niyze ahahyrytsa ba ziksiba – niy.

Kyze hawa Deus sihumo tsimypokzitsiukrēta mytsaty ziknakaranaha tahamyikaha bo pororo ziknakaranaha Paskoa inarokoha bo.

²⁹ Isareu tsekokatsa kino niwatihi Deus harere bo hȳ ziknakaranaha ihumo sispirikporētsa. Iwatsahi buburu zuba zitsikzanaha, siekze pihik nitsehespyk. Buburu zuba Pihik Tsikyri inarokoha niy. Bykyze Esito ezektsa atsatu koikny zitsikzakanahatsa tu pihik nisiharapusu. Batu aty tohi arehabyitsa.

³⁰ Aba Isareu tsekokatsa soho bo mytsaty my. Asaktsa Deus harere bo hȳ ziknakaranaha ihumo sispirikporētsa niaha. Sipehatsa Sosue tuk Deus humo sispirikporētsa h̄. Serikoho okpedawy haraharetsa ty iokarawyhyta iwatsahi sisukyrytsitsa ba ziknapupunaha, anahi inakarabaik. Nawa puruze usta tsyhyry humo petok, Serikoho petaba nikarikinahaze atsoko haraharetsa naktsaktsakbaiknaha.

³¹ Aba Rahabe soho bo mytsaty my. Atatsa Serikoho ezektatsa niy. Tapara kytsa hapik paikpa ziknaparakatatsa. Aiba eze atatsa Deus harere bo hȳ ziknakara ihumo tispirikporētatsa. Sosue kytsa Serikoho hudikhudikwy bo nisipehaze iwa nizokparakanaha, asahi sodadutsa pokso niwakiknaha. Iwaze atatsa wahoro bo izumunahaze atatsa ispe niy:

– Pakutaha. Ikza pahaokpitsihihik, bykyze kytsa pahaberinahaze ba zahapetumunaha – niy. Bykyzehu Serikoho hudikhudikwy ezektsa Deus

harere bo batu hỹ zikaha, iwatsahi kytsa nisibana-haze Rahabe batu. Atatsa itukytsa batu isty ba. Atatsa Deus harere bo hyỹ nikara ihumo tispirik-porētatsa tu nitare.

³² Aba ustsā kytsa Deus harere bo hyỹ zik-nakaranaha ihumo sispirikporētsa ahabo batu motsaso, Kideō, Barak, Sasō, Sepata, Dawi, Samue, ustsā Deus sohokotsa iwatsa sisoho batu motsaso, sisoho piwataha zeka ba zikpyk.

³³ Asaktsa Deus harere bo hyỹ ziknakaranaha ihumo sispirikporētsa hỹ. Ustsā tyryktsa bo niwatorokonahaze sisapy ziaksenaha iwatsahi niwakiknaha. Deus okzeka zisapywykynaha iwatahi isapyrēnikia ty sibo nyny niy. Wastuhu kytsa Deus humo sispirikporētsa iwatsahi ustsā kytsa parinita bo nisihorokiknaha, iwatsatu parinita humo batu siborohuk iwa Deus harere bo hyỹ ziknakaranaha ihumo sispirikporētsa ziwatawykynaha.

³⁴ Wastuhu kytsa Deus humo sispirikporētsa iwatsahi ustsā kytsa izo zuba bo nisioktsokik-naha, iwatsatuze izo humo ba zikarakoronaha iwa Deus harere bo hyỹ ziknakaranaha ihumo sispirikporētsa ziwatawykynaha. Ustsā kytsa asiba nisibanaha sokorotsapuzezety asaktsa niwakiknaha, Deus sihumo tsimypokzitsiukrēta iwatsahi niwakiknaha. Ustsā kytsa siakubyitsa tu sipunihikrētsa niyziknaha. Ustsā bipyritsa bo niwatorokonahaze sipunihikrētsa niyziknaha. Iwatsahi bipyritsa sipokso niwakbaiknahaze nan-abyitaba nitururukuknaha. Iwa ziknakaranaha Deus harere bo hyỹ ziknakaranaha ihumo sispirikporētsa.

³⁵ Aba wytykyryk soho bo mytsaty my. Asiza hi Deus harere bo ziknakaranaha ihumo sispirikporēza iwazahi sihyrytsa botu niakbanahatsa tu Deus nasihyrizikpowy tahajeza bo tu ziksizonaha.

Usiza sakyriukrēnikitsa nisimyitsapyriwykynahaze sinini nikaranahatsa nihyrikosokdanaha humo. Sakyriukrēnikitsa ispe:

– Deus harere bo yhȳ ahabyi zeka ihumo ahaspirikpobyihu ja iwatsahi ba zikamyitsapyrizonaha – niaha. Anahi batu siwabytoktoho. Myhyrikosokdanaha humo batu sipyby. Asiza tihi:

– Batu. Tsimyhyrikosokdanaha zeka, bykyzehu Deus mymyhyrizikpowyzo, iwaze mywahi ituk tsimynapykyryknaha h̄y – iwa mytsaty ziknakaranaha. Iwaze kytsa nisibanaha.

³⁶ Utsa kytsa Deus harere bo hȳy ziknakaranaha ihumo sispirikporētsa iwatsahi kytsa ziknasiapikiknaha. Nisisapybyikinaha. Nisikikinaha, myraratsa hwyk tsazikihi ty nisikikinaha. Karikutsitsiwytsa ty nisitsipatsawarakanaha, iwaze sakyriukrēnikitsa hurukwy bo nisihuruknaha. Asaktsa Deus harere bo hȳy ziknakaranaha ihumo sispirikporētsa tu kytsa nisimyiijaikiknaha nisisininiwykynaha.

³⁷⁻³⁸ Utsa kytsa Deus harere bo hȳy ziknakaranaha ihumo sispirikporētsa sisukyrytsitsa haraharetsa nisipaparakanaha iwa nisibakanaha. Utsa kytsa Deus harere bo hȳy ziknakaranaha ihumo sispirikporētsa sisukyrytsitsa tsapukte buruk bokokik niaha iwa nisibanaha. Sokorotsapuzeze ty nisibakanaha. Utsa kytsa Deus harere bo hȳy ziknakaranaha ihumo sispirikporētsa tahasukyrytsitsa pokso

niwakiknaha batu sisuku. Tahasuk ty myraratsa hwyk ty ziwowokonaha, hozipyrykza hwyk hi kaberito hwyk hi kino niwatihi tahasuk ty niaha. Jerukbara tahasapy niaha. Hara jobonita bo zukzuk niaha batu wahoroko. Harahare hoke bo tahokpitsikīnaha, wutyk hoke eze niwatihi tahokpitsikīnaha. Batu sidisahawyky taharapa zikziykikiknaha. Kytsa simyijaikiknahatsa ziknasiapikiknaha. Kytsa sisoho:

– O asaktsa sakmyitsakohok ziknakaranaha. Kytsa okzeka sakmyitsakoho niaha. Deus okzeka simysapyrētsa hỹ, mybarawy ezektsa batu sapy mykaranaha iwatsahi katyryktsa humo sisikpybyrētsa – Deus niy.

³⁹ Asaktsa Deus harere bo hyỹ ziknakaranaha ihumo sispirikporētsa babatsa. Deus sisoho hi:

– O ikiahatsa tsahamysapyrētsa tsimaha – niy. Simysapyrētsa mybarawy eze zikzurukunaha. Deus isapyrēnikia ty sibō nyny ahaziwazy niy. Iwatsa tu nihyrikosokdanaha.

⁴⁰ Deus aparakbaha nisisapywytsihikik. Iwatahi ziperyky mybo mytsaty nikara. Abaka asahi iharere bo hyỹ mynakaranaha ihumo sispirikporētsa myzubarētsa mymysapywyky. Ihumo mysapyrētsa tsimoziknaha. Iwatahi katsaktsa Deus zikwy humo mysapyrētsa tsimoziknaha, ustsā kytsa taparaktsa kino niwatihi ihumo sispirikporētsa simysapyrētsa moziknaha. Myzubarētsa Sesus watsa tsimoziknaha ihumo mysapyrētsa babatsa tsimoziknaha. Iwa hỹ.

Deus myzo.

¹ Kyze asaktsa taparaktsa sizubarëtsa Deus harere bo ziknakaranaha ihumo sispirikporëtsa. Hawa haeze zikzurukunaha tsiwabynaha ana humo hi katsa hi:

– O Sesus harere humo pykyhytutaha hyÿ tahaktsa. Hawa mymysapybyitsa tsikykaranaha tsimoewynahaktsa – tsimaha.

Atakta moparakze tapara pomo tsihikik amy titsakyrïkrëna zikatsimoewy. Iakubyri mozumu zeka iwatatu ba pyk ziky. Katsa mysapybyitsa tsikykaranaha iwa tsimoewynahaktsa! Nanabyi soho bo ka mytsaty mytsaty byitaha! Katsaktsa tsipimyïkinaha iwatsahi Sesus harere humo hyÿ tahaktsa! Tapara zumu tawa tsimoziknaha. Iwaze Deus humo myspirikporëtsa tsimoziknaha.

² Sesus bo mytsatzyiutahaktsa! Ihumo Deus harere bo hyÿ tynakaranahaktsa! Atahi Deus humo tispirikporëta hÿ. Deus harere bo hyÿ ziknakara. Iwata tsimoziknahaktsa! Atakta nihyrikosokdaze tatuktu isopyk:

– Bykzehu kazo tuk kakurëta mozik. Asaktsa zikmyïjakanaha iwatatu sisapyzesty iharapatawyhyta humo myhyrikosokda. Kytsa hi:

“O kytsa iharapatawyhyta humo mohyrikosokda zeka sisikpybyrëtsa maha.” Siwa ba mytsaty ziky batu kasikpyby. Deus harere bo hyÿ ikykara iwatahi ituk kawahi mopykyrykze kakurëta hÿ ana soho bo mytsaty mynakara. Iwaze tsihokdaharëna Deus humo kamypokzitsiarëta iwatatu mohyrikosokda – niy. Abakã Deus panuryk taba modyhyky. Deus tuk ityryktsa mysipeha.

³ Hawa Sesus sinini ziknakara naha bo mytsaty tahaktsa! Sakyriukanikitsa ihumo batu siakparawy. Asaktsa Deus harere bo batu hỹ zikaha sispirikpobyitsa tu iwatsahi ziaknikinaha. Atahi tsipunihikrēta hỹ. Iwata bo hi mytsatytahaktsa! Iwaze iwata ahapunihikrētsa tsimoziknaha. Ihumo tsimyspirikpotohinaha.

⁴ Simysapybyitsa mymypeha tsihikiknaha. Deus wasania ty sibo tsiktsasonahaze ana humo hi zahamyijakanaha. Asahi pahabanahatsa ziwazy. Sesus wata batu sinini tsimykaranaha.

⁵ Deus harere bo mytsatzyiutahaktsa! Iharere papeu humo botu ziwatahaka iwa niy. Deus tahyrytsa humo nawa isopyk iwatahi botu ziwatahaka:

— Kahyrytsa pahasininiwyky zeka tsiwabytoktonahaktsa!

Ikiahatsa sinini tsimykaranaha ana humo hi tsinymyrykynaha.

Utakta pahapehahikze tubyizuba taha!

⁶ Mypehatsa myhumo tsimypokzitsiukrēta iwatahi mymysininiwyky iwaze mysapyrētsa tsimoziknaha.

Kahyrytsa spirikpowy bete mysipehako iwaze wasani mykaranaha iwa kaharere bo piwabytoktokonaha — niy.

Iwa Deus harere papeu humo niy. Ana humo hi ahaspiriktsokda byihuja!

⁷ Iwaze sinini tsimykaranahaze ahakubyrisoroktsaktsa! Sinini tsimahaze ahatuktu tsimaha:

— O myzo bijoikpe eze tu mysapyrētsa tsimoziknaha iwahi mozihihikik, iwatahi pahasininiwyky

– tsimaha. Katsa myhyrytsa pimyinahaze myta-harapehanaha, Deus mykara nawatihi.

⁸ Aty itse isopyksapybyita tuze ipe ahabyizeka:

– Atakta isopyksapybyita atsebyitatu my – tsimaha. Deus kino niwatihi tahyrytsa mysipehaka iwatsahi simysapyrētsa moziknaha. Ispehahuk byizeka batu ihyrytsa babatsa zikyzyknaha.

⁹ Mypykbyize myzotsa harere bo yh̄y tsikykaranaha. Ziknamypehakanahaze siharere bo yh̄y ziknakaranaha. Asahi kytsa zuba iwatsa tu siharere bo yh̄y tsikykaranaha. Deus hi bijoikpe eze tuze ihyrikoso my, ata harere humo pykyhytu hȳy tahaktsa! Iwatahi ata mymypehaze iharere humo atsoko hȳy tsimykaranaha, iwa ituk mywahi tsimynapykyryknaha.

¹⁰ Myzotsa ziknamypehakanahaze mysapyrētsa tsikyzyknaha. Sisopyk humo wasani tsikaha, ana hi nizihikiknaha. Deusta tsihyrynymyrēta iwatahi iharere wasani nikara, iwa mysapyrētsa babatsa tsimoziknaha ana humo hi mozihikik, Sesus wa tsimoziknaha ana hi mozihikik.

¹¹ Deus mymypehaze mysukatsihikrētsa tsi-moziknaha. Sinini tsimykaranahaze batu myku. Bykyzehu mykurētsa tsimozikzonaha. Mydikrētsa Deus harere humo hȳy tsimykaranaha, iwatsahi mysapyrētsa tsimoziknaha h̄y. Mysapyrētsa tu Deus harere humo hȳy tsimykaranaha iwatsahi mykurētsa h̄y.

Deus harere bo zuba hȳy tsimykaranaha.

¹² Iwatsahi ahabo ka mytsaty mytsaty byita-haktsa! Sisukatsihikrētsa tysitsumuēh̄nahaktsa!

Asahi tsikaeni zuba Deus harere humo hyĩ my-nakaranaha. Iwaze ahahumo sispirikporętsa moziknaha.

¹³ Wasani haty zuba ikiahatsa mytsatyiutihak-tsa! Iwatsahi sisopyksapybyitsa tu simysapyrętsa moziknaha.

¹⁴ Ahaõtutsa pauksitsa bo tysisapywykynahatsa kytsa! Harape tybetsak betsak byitaha! Mys-apyrętsa babatsa tsimoziknaha. Mymysapybyitsa tu tsimykaranaha zeka mypehatsa Sesus ba ziny-naha.

¹⁵ Deus myhumo tsimypokzitsiukręta, myzibytuhukutu myhumo tsimypokzitsiukręta iwatsahi tyharape tsumuęhĩnahaktsa kytsa! Deus harere humo hyĩ tsimykaranaha iwa tyharape tsumuęhĩkĩnaha. Wiharata iskpita wata anahi imyrawywy wata ahabyitaha. Wiharata myrawy batu sapy my. Aty Deus harere bo batu hĩ ahabyi zeka itukytsa kino niwatihi Deus harere bo batu hĩ zikaha. Atakta batu imysapy my. Wiharata iskpita wata. Iwatsahi pykyhytutaha kytsa! Ahatukytsa tysitsumuęhĩkĩnahaktsa! Iwaze kytsa ahaharere humo ba zikmyinaha.

¹⁶ Asahi mekta oke tu pipyrirykyze tysitsumuęhĩnahaktsa! Kytsa Deus harere bo zuba hyĩ mykaranaha tyharape pokzitsinahaktsa! Esau wata ba zikaha. Atahi Deus harere bo batu hĩ nikara. Atahi taparakta taypykta myhyrizikwani. Tabo zuba mytsaty ziknakara. Tsaraparęta niyze tatsy pe niy:

– O katsy adisahawy ty kabo nynytykta. Uta tapara ikypykta hi myzo mohyrikosokdaze ihyrikyky kanamy mozik! Abaka adisahawy

ty kabo nyny tsimy zeka ikia taypykta wata tsimozik, myzo mohyrikosokdaze ihyrikyky anamy mozik. Ikia kasapyzeken tsimozik iwatahi Deus pasapywyky. Iwa tsimyzeka adisahawy huak zuba – niy. Deus harere humo batu hỹ niy, iwatahi tadisahawy bo zuba mytsaty nikara. Iwabyitaha.

¹⁷ Aibani zuba Esau myhyrizikwanita niyzik tsihikik. Izo itsyhyryze Deus bo nipamykyso tsihikik ba hawa tohi zikaha. Itse iykpykbita tsyhyryze botu Deus bo nipamykyso. Iwa hỹ. Tapara taypykta tisukatsihikrẽta nikara. Nipuziuku. Deus pisapywyky ana hi nizihikik. Hawa niy ahahyrinymyrẽtsa iwatsahi iwata byitaha!

¹⁸ Kyze taparaktsa myzotsa hara jobonikita bo zumukunaha hara inarokoha Sinija. Zumunahaze izo zuba. Bijoikpe satata nioktsirõrõ miwa niyzik. Zopoktsa inabybyknaha. Ana pokso sipybyrẽtsa. Ana kino nimypybytykynaha.

¹⁹ Sibekeresuka hyritywa ziwabynaha. Deus yksoho ziwabynahaze sipybyrẽtsa nikaranaha:

– O niwazubaktsa! katsa mpybyrẽtsa – niaha.

²⁰ Moises tihi:

– Hara jobonita bo ka zukzuk byitaha! Myraratsa harasukpetara bo ka dodo byitaha. Estuba harasukpetara mydo zeka tsibezekta! Haraharetsa tysipaparanahaktsa iwatahi tsibezenaha – niy. Ana harere pokso sipybyrẽtsa.

²¹ Moises niwatihi tsipybyrẽta. Hara bete niapykykze nanabyi bo nikozone ana pokso hi tsipybyrẽta:

– Nanabyi bo ikozone ana pokso mytydydykyktu. Kapybyrẽta mykara – niy.

22 Niwazuba! Ikiahatsa batu siwatsa tsimaha. Deus harere tsipiwabynahaze ahapybybihu ja. Ikiahatsa usta hara bo jobonikita bo tsikzumunaha. Ata hara Siaõ inarokoha, anaeze hi Serusarêhe hudikhudikwy my. Deus koikny baktatu isapy bo tsikzumunaha. Isapy Serusarêhe inarokoha bijoikpe eze kino niwatihi. Anabo hi tsikzumunaha. Anaeze Deus tsumuêhĩtsitsa mynapykyknaha, bijoikpezektsa sizubarêtsa mynapykyryknaha. Deus humo sakurêtsa nikaranaha.

23 Kiristu Deus zipehata ityryktsa bo tsikzumunaha. Siwatsa ityryktsa tsimaha niwatihi. Sizubarêtsa Deus tyryktsa maha. Tapara taypykta tawata myhyrizikwanitsa moziknaha. Deus papeu humo sinaro ziwatahaka ana papeu bijoikpe eze tu my iwatsahi sakurêtsa hỹ. Ikiahatsa Deus bo tsikzumunaha. Atakta kytsa huak ty sizubarêna ty nyny my. Asaktsa mybarawy ezektsa wasani ziknakaranaha, iwatahi isapyrênikia ty sibo nyny my, tahawahi Deus tuk mynapykyryknaha. Utsa mybarawy ezektsa simysapybyitsa tu ziknakaranaha Deus sinini ykarawy bo mysipeha. Ikiahatsa sihyrizikararawytsa bo tsikzumunaha. Asahi Deus humo simysapyrêtsa niyziknaha.

24 Sesus mytsapuhyripyrywyta bo tsikzumunaha. Ata humo hi mysapyrêtsa tsimoziknaha. Abaka Deus harere mybo nitsasoko. Nihyrikosokda iwatsahi ispu humo mysapyrêtsa tsimoziknaha. Hawa taparaktsa siraratsa spu Deus bo wabehyryk ziknakaranaha, katsaktsa Sesus spu humo mysapyrêtsa tsimoziknaha ispu tisapyrêna hỹ.

Kaĩ tatsy zibezehik iwatsahi ispu humo mytsaty tsimykaranahaze. Katsa Deus pe tsimaha:

– O Deus ikia Abeu spu tsipitsapusare tsimaha. Sesus mysapyzekenihyrikosokda iwatsahi ispu bo mytsaty tsimykaranahaze, Deus pe tsimaha:

“O Deus mysapybyitsatu tsikykaranaha iwatahi Sesus spu humo tsimymyokzo” tsimaha.

²⁵ Iwatsahi Deus harere bo wabyziutahaktsa! Tubabatu Deus hara Sinija inarokoha bo niy. Moises Deus harere taparaktsa bo nisihyrinymyryikik. Batu hỹ – niaha. Iwatsahi sinini ziknakaranaha, sihuak ty Deus sibo nyny niy. Batu siaku. Abaka Deus bijoikpe ikny mymyhyrinymyryky. Iharere bo yhỹ ahabyi zeka sinini tsimykaranaha hỹ.

²⁶ Sinija jobonita bo izumuze kytsa bo nitsaso, nitsasokoze mybarawy nitydydykyk tu. Abaka mytuk mopamykysokozo atahi:

– Mybarawy pitydydywyzo. Mybarawy pitydydywyzoze. Bijoikpe kino niwatihi pitydydywyzo – niy.

²⁷ Deus hi:

– Estuba zuba mybarawy pitydydykyzo – niy. Iwatahi mybarawy nizukni hana bo ja meky watu mozikzo. Mybarawy bijoikpe kino niwatihi izikwy humo ezytyk mozikzo. Itydydykokbara zuba motare.

²⁸ Deus hudikhudikwy ba zihokza, anaka itydydykokbara. Deus myzubaha bo abazubata mozik ba hawa tohi zikzukninaha. Anaeze ituk tsinapykyryknaha. Iwatsahi Deus bo tsimysakibazikiknahaktsa kytsa!

– O Deus ikia zuba apunihikrēnikita. Ikie zuba amysapyrēnikita ahumo ka mykurētsa hỹ. Abaka mywahi atuk tsimynapykyryknaha ana humo hi mykurētsa – tsimaha.

O kytsa iharere humo pykyhytu wabyziutahaktsa! Hawa ha ty mozihihik naha ty zuba tsimahaktsa! Atahi abazubata ihumo mypybyrētsa iwatsahi iharere bo zuba hyỹ tsimykaranaha.

²⁹ Deus harere bo hyỹ tsimykaranaha ihumo myspirikporētsa. Izo mokorobaik nahawa. Deus izo waha, asaktsa iharere bo yhỹ ahabyizeka nasipykwy izo waha hỹ.

13

Hawa tsimyzurukunaha Deus myhumo tsakurēta.

¹ Kyze ikiahatsa Sesus tuktsa tyharape pokzitsikinahaktsa!

² Sisukmotsa ahawahoro bo mozumunaha zeka ikiahatsa hi:

– Mywahoro bo paku paku tynaha ahawanu ty haĩ haĩ taha – tsimaha. Sihumo ahamypokzitsirētsa tsimaha. Tubabatu wastuhu kytsa sisukmotsa pe:

– Paku paku taha – niaha. Sisukmotsa zubitsa ja nikaranaha asahi bijoikpe iknyktsa Deus tsumuēhĩtsa niaha.

³ Asaktsa sakyriukrēnikitsa hurukwy eze niapykyryknaha sibo mytsatyziu tsimykaranaha! Sibaze tu watsa sibo mytsaty tahaktsa! Tysisapywykynahaktsa. Kytsa sinini mykaranahaze sibo mytsatyzitahaktsa! Ahape tu tsimykaranaha:

– Tozeka ja katsa kino niwatihi sinini tsimyanaranaha – tsimaha. Iwatsahi tysisapywykynaha.

⁴ Ikiahatsa hi tsikaha:

– O katsa tsimymysukzanahaze wasani tsimaha – tsikaha. Wasani hiba. Aty ustatsa pihuahua tsihikikze batu isopyksapy my. Amatatsa ustatsa barikta pihuahua tsihikikze batu isopyksapy my. Iwa tsimyzurukunaha zeka Deus pahamyitsapyriwyky.

⁵ Ahaokyrysaro soho bo ka mytsaty mytsaty byitahaktsa! Ahanamy humo ahakurētsa ana kino tsikaeni zuba tuzihikiknaha! Deus hi ahape my:

– Utakta ahapok baze tu mynapykyryk, iki-ahatsa kakparawy iwatahi ba zahaerek – my. Iharere humo ahakurētsa hỹ. Deus ahasoho humo ba zikspiriktsokda.

⁶ Iwatsahi ahapunihikrētsa tsimoziknaha. Ust-saktsa sipybyrētsa pe:

– Mypehakatsa mymytsumuēhĩkĩ.

Kytsa pokso batu mypyby.

Hawa kytsa mybo mykaranaha ana pokso batu mypyby.

Deus hi myhumo tsimypokzitsiukrēta my-nakara – tsimaha.

⁷ Ahapehatsa soho bo mytsaty tahaktsa! Tubabatu Deus taharere ty zahahyrinymyrykynaha. Hawa zikzurukunahaze ahaspiriktsokdabyihu ja. Hawa wasani ziknakaranaha. Nihyrikosokdana-haze Deus humo sispirikporētsa hỹ. Siwa tahaktsa kytsa! Ikiahatsa kino Deus humo tyspirikpotohinaha.

⁸ Sesus Kiristu kino atahi my. Hawa tapara ziknakara aba kino niwatihi mynakara. Aiba eze kino niwatihi astatu mynakara. Koikny baktatu mykara hỹ.

⁹ Utsa kytsa siharere pahahyrinymyrykynaha zeka siharere meky watu maha. Deus harere humo batu zahahyrinymyry. Mydisahawy soho humo pahahyrinymyrykynaha. Pahaspihik-batakanaha. Siraratsani tsimymydisahakanaha zeka wasani my. Siraratsani ty hauk ahabyizeka wasani my. Deus harere humo zuba mysapyrẽtsa tsimoziknaha atahi mymysapywyky hỹ.

¹⁰⁻¹¹ Tubabatu Deus wahoro zubata eze taparaktsa ziknapamykysonahatsa iwa ziknakaranaha. Siraratsa nisibaiknaha mysopyksapybyitsa tsikykaranaha humo nisibaiknaha. Deus siraratsa spu bo iktsa niyze iwatahi nisiokzohik. Iwaze siraratsa spu Deus imysapyrẽnikia bo zibykyryk.

— Taparakta ziknapamykysokota imysapyrẽnikia bo nitsuk — niaha. Anaeze Deus siraratsa spu bo iktsa niyze taokaniki iwata tu kytsa sisopyksapybyitsa nikaranaha humo nisiokzohik. Kytsa siraratsa nurytsa nokponi ziknasiskiknaha. Sihudikhudikwy bara botu nasiskiknaha. Anaeze nisiwezokonaha. Batu sizoho ziboronaha.

Siraratsa wata Sesus nihyrikosokda. Mysapyzesty nihyrikosokda iwatsahi ihumo mysapyrẽtsa tsimoziknaha. Hawa siraratsa nurytsa sihudikhudikwy bara botu ziknasiskiknaha, iwaze Sesus nihyrikosokdaze, kytsa sihudikhudikwy bara botu zibezenaha.

Deus ispu bo iktsa niyze iwatahi mysapybyitsa tsikykaranaha nimyokzohik.

¹² Sihudikhudikwy bara botu nihyrikosokda. Kytsa sispirikpobyitsa tu nizukyryknaha. Anaeze iharapatawyhyta humo zihyrizikiknaha. Iwaze mysapyzeken nihyrikosokda.

¹³ Iwatsahi Sesus wata tsimahaktsa! Mysapyzeken nihyrikosokda. Iwatsahi hawa Sesus mozihikikze tsimaha. Kytsa myharere bo yhy ahabyizeka wasani my. Mymymyijakanaha zeka wasani my. Iwatahaktsa!

¹⁴ Katsaktsa mybarawy eze tu tsimyzurukunaha, mysapy eze tu tsimynapykyryksyknaha hawa eze tamiwy. Usa hudikhudikwy taberi. Bijoikpe myhudikhudikwy baba mozik. Ana hi mysapy mozik. Anaeze Deus tuk tsimynapykyryknaha.

¹⁵ Iwatsahi Deus bo tsimysakibaziknahaktsa! Katsa hi:

— O Deus myzo Sesus humo ikia bo tsimypamykysokonaha. Ikia zuba amysapyrēnikita. Ikia zuba abazubata. Ikia humo ka mykurētsa tsimoziknaha — tsimykaranaha. Ana hi Deus piwabyze tsakurēta mozik. Tubabatu kytsa siraratsa ty Deus bo nyny ziknakaranaha. Abaka myraratsa ty ba nynyzo zikaha. Abaka myharere ty ibo tsimytsasokonaha. Iwatahi myharere humo tsakurēta mozik.

¹⁶ Sinamybyikitsa tysitsumuēhīnahaktsa! Asaktsa batu sidisahawyky ahadisahawy ty sibo nyny-taha. Kytsa bo tysisapywykynahaktsa! Ahaspiriktsokda byihuja. Iwatahi Deus ahahumo tsakurēta mozik.

¹⁷ Ahapehatsa harere bo ma tynakaranahaktsa! Siharere humo pykyhytutaha hyŷ tsimykaranaha. Ahahyritzikararawytsa humo simypokzitsiukrĕtsa. Deus bo hawa pahapokzitsikinaha zeka motsasokonaha. Myzaharapokzitsikinaha iwaze ahamysapyrĕtsa tsimoziknaha. Iwatsahi pahatsumuĕhĩ tsihikiknaha. Siharere bo ma tsimykaranaha zeka sakurĕtsa maha. Siharere bo yhŷ ahabyi zeka sisukatsihikrĕtsa maha. Iwa zeka ba zatsumuĕhĩnaha.

¹⁸ O kytsa mytsyhyryze Deus bo ty-pamykysokonahaktsa! Deus okzeka wasaniha humo zuba tsimyzihikiknaha. Mypetu mysopyk iwatsahi batu tyso. – Sozeka ja wasani tsizurukunaha. Batu mynyhy – iwatahi batu tyso. Katsaktsa Deus okzeka wasani tsimykaranaha ana humo hi myhyrinymyrĕtsa hŷ.

¹⁹ O kytsa ahabo myziksi tsihikikzo. Deus bo katsyhyryze typamykysonahaktsa! Ikiahatsa hi:

– O Deus myzo aidytynykta mybo tyziksizo – tsimaha.

Deus bo mopamykysoko.

²⁰ Uta Deus bo ahatsyhyryze mopamykyso:

– O Deus ikia humo zuba sakurĕtsa moziknaha. Ikia hi mypehatsa Sesus tsikzihyrizikpowy. Abaka sihumo tsimypokzitsiukrĕta hozipyrykza perytsa wata atahi hozipyrykzatsa mysiperyky my. Sisapyzeyky nihyrikosokda iwatsahi meky watu niyziknaha, ihumo simysapyrĕtsa niyziknaha iwatsahi atuk tawahi mynapykyryknaha hŷ.

²¹ Myzo aharere bo zuba hyŷ tynakaranaha, ana humo kino tysitsumuĕhĩ! Hawa tsimyzihikik

ana humo kino tysizikwykyrykta. Ahumo sipuni-hikrētsa moziknaha. Hawa tisapyrēna humo tysit-sumuēhīkī. Asahi:

“Sesus Kiristu ikia amysapyrēnikita. Ikia zuba tsahyrizikporēta” iwa tawahi mykaranaha ana hi myzo bo myzapykyky – my.

Iwa Deus bo ahatsyhyryze mopamykysoko.

Abaka pepykbaka.

²² Kyze katukytsa kaharere tsiwabytoktonahaktsa! Utakta pahakusukniki iwatsahi ikiahatsa Sesus tuktsa babatsa tsimoziknaha ana humo hi papeu humo ahabo piwatahaka. Kahumo ja ahakubyrisorokok kawatahaha pykyhytu tspinymyrynaha. Kapapeu humo jokboha zuba iwatahaka.

²³ Mytsy Timoteo soho tawaby tsihikik. Sakyriukrēnikitsa hurukwy ekze zoihik. Iwatahi piperyky. Mozumu zeka ituk ahabo tsimynakozorenaha.

²⁴ Katsaktsa ahapehatsa bo, Sesus tuktsa sizubarētsa pe:

– O mytukytsa ahahumo myhyrizikbarētsa – tsimaha. Sesus tuktsa Itaria ezektsa kino niwatihi ahahumo sihyrizikbarētsa.

Deus pahasapywyky.

²⁵ Ahatsyhyryze Deus bo mopamykysoko. – O myzo tysisapywyky sihumo amypokzitsiukokta! – my. Niwazuba.

Deus Harere Aibaky Sesus mymyspirikpoko naha

New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

2f0260ea-5969-5180-9ac5-183d63a989f1